

অক্ষকান

মাহেকীয়া সাহিত্য সংকলন
বিশ্বপ্রিয়া মণিপুরী

১লা মার্চ

১৪৩১ সন

১লা মার্চ ১৩৮৭



শুভ উদ্বোধন

১ মার্চ, ১৪১১ সন

সম্পাদক

শ্রীশ্রী কুমার মৈত্রেয়

ভাঃ বনসেবা (অবঃ প্রাপ্ত)

APARUPA

A monthly, Sahitya Sankalan, Published in Bishnupriya Manipuri Language, Printed at Angelica Imprint, Gancshguri, Guwahati - 781 005

Editor - Compiler

M. K. Sinha, IFS (Retd.)

Publisher

Shankar Sinha
Rajgarh Road
Guwahati - 7

Cover Designed by


Net Education Brotherhood
Rajgarh Road, Guwahati -7

Copy Right

M.K. Sinha, IFS (Retd.)
Guwahati -7

Price

Rs. 25.00 only



APARUPA

A Monthly Sahitya Sankalan, Published in Bishnupriya Manipuri Language.

Editor - Compiler
M. K. Sinha, IFS, (Retd)
Guwahati - 781 007

Publisher
Shankar Sinha
Guwahati - 781 007

Cover Designed by
Net Education Brotherhood
Rajgarh Rd. Guwahati - 781 007

Printer
Babul Sinha (Niva)
Chandrapur, Silchar

Cover Printed by
Angelica Imprint
Ganeshguri
Guwahati - 781 005

Copy Right
M. K. Sinha, IFS (Retd.)
Guwahati - 781 007

Price
Rs. 20.00

All communication to be addressed to
M. K. SINHA, IFS (RETD.)
Rajgarh Rd, West bye lane - 12
Kundil Nagar, House No. 47
Tele - 0361 - 2514041, 2340204

অপরাধ

মাহেকীয়া সাহিত্য সংকলন

বিষ্ণুপ্রিয়া মণিপুরী

১লা বছর, ১লা সংখ্যা, 1st yr, Vol. 1. মাঘ, ১৪১১ সন

সূচীপত্র

১। অপরাধ	মণিহার সিংহ	১
২। কপ্তাই ধর্ম	ফাঙ্কুণী সিংহ	১
৩। প্রার্থনা	সেবাব্রত সিংহ	২
৪। আর জনমে ইমা	বিভূতি ভূষণ সিংহ	২
৫। শান্তি কুম্ভেই	ডঃ মণি সিংহ	৩
৬। সুনামী	পরমেশ সিংহ	৫
৭। জারর ব্যাখ্যা আছেতা	রেবতী মোহন সিংহ	৬
৮। দ্রৌপদী সত্যভামা	রাধাকান্ত সিংহ	৮
৯। ব্যাংককে বিবুর দিনে	সুনন্দা সিংহ	১০
১০। সাহিত্য বারো সাহিত্যিক	বলদেব সিংহ	১৩
১১। শহীদ কুশল কোঁবর	সুনীল কুমার সিংহ	১৪
১২। অমৃত চয়ন	ব্রজ গোপাল সিংহ	১৬
১৩। মাতৃ সুরক্ষা	ডঃ সুকুমার সিংহ	১৬
১৪। চিঠি পত্রে মতামত		১৭

সম্পাদকীয়

বিবর্তনের হাদিয়েদে গুজুরে যারগা আমার বিষ্ণুপ্রিয়া মণিপুরী সাহিত্য পারিপার্শ্বিক সাহিত্যর উচ্চমান লাকপানি মনেইয়া খংচেং দীঘল বারো চালাক করেছে।

পনরশ খৃষ্টাব্দ পেয়া আমার সাহিত্যর মূর্তিগ শেঙ নেই। যোলশ খৃষ্টাব্দে আঠারশ খৃষ্টাব্দ পেয়া ব্রজবুলিল সাহিত্য চর্চা রংখা রংখা আছিল। উনিশ শতাব্দীত আমার সাহিত্যর দিকাকেই আককাকেই বেলানি দেহিয়ার। কিন্তু উতা হাবিয়েই প্রায়শঃ বাংলা ভাষার মাধ্যমে চলেছিল। খানি মানি সংস্কৃত ভাষাত অছিল। উনিশশতিরিশ খৃষ্টাব্দে বিষ্ণুপ্রিয়া মণিপুরী ঠারে সাহিত্য চর্চার জাগরন আহান আহেছিল। উনিশ শ ফাইট খৃষ্টাব্দে বিষ্ণুপ্রিয়া মণিপুরী ঠারে সাহিত্য চর্চার হত আগ আহেছিল। উনিশ শ আশি সনেও বিষ্ণুপ্রিয়া মণিপুরী সাহিত্য চর্চা ব্যাপক অনা অকরেছিল। উবাকা জাতির অস্তিত্ব রক্ষার, ভাষা স্বীকৃতি, ভাষা প্রচলন, জাতীয় কৃষ্টিকলা, আর্থ-সামাজিক উন্নতির লালফাম ঘোর ঐয়া দেহাদিলে লেইরিক-লেইছো আদি আমার ঠারেই নিকুলিল। ফাঙ্কুদুহান আহান লেইরিক বাংলা ভাষা বা ইংরেজি ভাষাত নিকুলেছিল। আমার ঠারে পত্র পত্রিকাউ সম্ভবতঃ আশি দশকেই নিয়মিত এল। উনিশ শ তিরিশ দশকে আহান দুহান পত্র-পত্রিকা নিকুলে নিকুলে ঝিপেছিল। উনিশ শ শতর দশক পেয়া “নুয়া এলা” “নুয়া দৃষ্টি”র যুগেও বিষ্ণুপ্রিয়া মণিপুরী ঠারে বিষ্ণুপ্রিয়া মণিপুরী সাহিত্যর চর্চা যারাকনা ঠেকেছে। দুইহাজার তিন খৃষ্টাব্দে, তিন মাহিয়া বিষ্ণুপ্রিয়া মণিপুরী সাহিত্য সভা পত্রিকা, আসাম, অত্যাধুনিক সাহিত্য পত্রিকার মূর্তি পালকরেছিল। এহানে বিংশ শতাব্দী পেয়া বিষ্ণুপ্রিয়া মণিপুরী সাহিত্যর আদি যুগ ধরানি যাকরের।

“হবে কুরি আহের সাহিত্যর ফুলবনে”, ‘অপরাধ’র প্রকাশ কুরি আহেছে ফুলবনে ফুল শাত করানির হর কাঙ খৌনা হান। বিষ্ণুপ্রিয়া মণিপুরী সাহিত্যর পূজারী শ্রদ্ধাবান লেখক-লেখিকা, সুধী পাঠক-পাঠিকা বৃন্দে “অপরাধ”য় লেই চন্দন দেয়।

“অপরাধ”য় যুতেছে বিষ্ণুপ্রিয়া মণিপুরী সাহিত্য কাননে এ “সাহিত্য সমারোহ” সফল করানির দায়িত্ব অর্পণ করুরী সাহিত্য প্রেমী, সাহিত্য সেবী হাবিরে। ইতি

১লা মাঘ, ১৪১১ সন।

গুৱাহাটী

মণীন্দ্র কুমার সিংহ

সম্পাদক

পরিচালক কথা আকচুটি

দ্রুতলয় বিবর্তনের বিশ্বব্যাপী আন্দোলনে বিশ্বপ্রিয়া মণিপুরী সাহিত্য আজি আন্দোলন মুখী। আমার মুগুর পারেঙর সাহিত্যিক, ইন্দ্রকুমার, ব্রজেন্দ্র, মদন মোহন মুখোপাধ্যায়, জনগণ বারো সরকারর স্বীকৃতি পানির লগে লগে সাহিত্য চর্চার পরিবেশে পরিবর্তন দেখা দেছে। সাহিত্য চর্চাত জাগরন আহেছে। আমার সাহিত্যিক এবাকা সাহিত্য একাদেমী পুরস্কারর বারাদে মিস্রেঙ দেছি। উচ্চ মানর সাহিত্য প্রকাশ পার। পাঠক পাঠিকাউ ঔসাদে খোঁরাঙ ঐয়া আমার ঠারর সাহিত্য পাকড়তারা।

আমার বিশ্বপ্রিয়া মণিপুরী সাহিত্য জগতে এবাকা উদীয়মান যশস্বী সাহিত্যিক অনেক অনেক। ও তুলনাত প্রকাশক অতি য়াৎ। উতারমা নিজর লেইরিক নিজস্ব প্রকাশনাত ছাপানিয়ে য়াম। এবাকার সাহিত্য চর্চার পটভূমিকাত লেখক হাবিরে প্রকাশর ফাম দেনা চিলছে।

ফুলগ শাইতয়া বেলির মিঙাল নাদেহিয়া কুরিগত সুমৈয়া পড়লে ফুলঝার অকরানির কানাহান কিহান? আমার কত সাহিত্যিকর কত রচনা প্রকাশর ফামর খুওনিয়ে শাত নুয়ারিয়া করপেকে থা য়ারগা। পাঠক পাঠিকার মিঙালে নাহের। উতাহাবি শাইতলে এদিন হাবিত আমার সাহিত্যর শ্রীবৃদ্ধি ঐলেছ।

প্রকাশ নাইলে বিকাশ নাউ অর। বারো বিকাশ নাইলে পরিচিতিউ নেই। বিশ্বপ্রিয়া মণিপুরী সাহিত্যরে পরিচিতি দেনার সালে, বিশ্বপ্রিয়া মণিপুরী সাহিত্যরে বিশ্ব সাহিত্যর থংচিলহান পেয়া খিলকরে দেনার খোঁরাঙে এ ‘অপরাধ’। পারি-পার্শ্বিক সাহিত্য জগতর বদাগ পেয়া খিলকরে পারলেউ মোর ‘অপরাধ’ পরিচালনার আশাহান থুঙেল নিঙকরতো।

ইমা ঠার পুষ্টি পালক।

মণীন্দ্র কুমার সিংহ

১লা মাঘ, ১৪১১ সন

গুৱাহাটী

প্রকাশক কথা আকচুটি

বিশ্বপ্রিয়া মণিপুরী ঠারর লেরিক প্রকাশনী জিংতা করিয়া থনা অতি কঠিন কর্মহান। আজিকালি প্রিন্টিং টেকনোলজি যেসাদে অ্যাডভান্স অছে, প্রিন্টিং মেটেরিয়েলউ ঔসাদে গুণে মানে, দর্শনে আহি মিচ্ছিলার। মুঠতে ‘একসে বার কর এক’ অছে। “ব্রেক এন্ড হোয়াইটর” যুগহান বেলেইয়া “কালারর” যুগে হমানির লগে লগে প্রিন্টিংর খরচ পাতি এমার্টিক যে বাড়েছে প্রকাশনী আকেইগী, লেরিক দুহান তিনহান প্রকাশ করিয়াই দুয়ার ঘাটতারা। উতার গজে ‘অপরাধ’ এহান মাহেকীয়া অনায় অতি ব্যয় বহল কর্মহান ঐতে।

কিন্তু উতাস্তউ কঠিন কর্মহান অছেতাই ‘অপরাধ’হান আতে আতে ফৌকরে দিয়া পারানি। আমার ঠারে টটরতারা মানু শহর আকেইগী বা পরগনা আকেইগী বুজিয়া সালিয়া না পড়েছি। শহর আগোত যেসাদে গাঙ বা পারা আহানাত ঘর ছয় হাতগ পরেছি ঔসাদে পরগনা আগোত গাঙ ছয়হাতহান পড়েছি। আমার মানুর লাইব্রেরীউ নেই। লাইব্রেরীত “Out Book” লয়া পাকড়ানির শখ বা অভ্যাস কম। ঘরে ফৌকরে দিলে পাকরতারা। উত্তাউ কম। কারণ, এবাকা পেইয়া হারপাছুহানি “মাঙকরানির মত সময়” বারো “মাঙকরানির মত ধন” আমার মানুরতা নেই। “মাঙকরানির মত” বুলিয়া মাত্তারা কথাহান ঐলতাই আত য়াৎ মানু আমারতা আহি লেইরিক-লেইছৌ বিশেষ করে “Out Book” লয়া পাকড়ানি এহানরে কানাহান বুলিয়া খালকরতারা। এহানে আমার ঠারর লেইরিক য়াম পারা ঐলে দ্বিহৌ-তিনহৌ বিকের। এবাকা প্রকাশনার খরচ তুলানিরকা দাম বাড়েইলে, লেরিক না বিকের। দামহান না বাড়ইলে প্রকাশনার খরচ না উঠের। অর্থাৎ প্রকাশকর নিংখা থেপর।

এহানে লেইরিক প্রকাশ করানি ওয়াইচিলছে। যে যে গিরি-গিথানীয়ে নিজর লেঙকরা লেরিক নিজে ছাপেইয়া প্রকাশ করেছি, তানু য়াম পারাতায়, ইকরিয়া ছাপানি বাদ দেছি - খরচর ভারি হানে।

কিন্তু লেইরিক লেইছৌ নাইলে সাহিত্যর বিকাশ নার। সাহিত্যর বিকাশ নাইলে জাতহানর সভ্যতা, সংস্কৃতি, কলা-কৃষ্টির বিকাশ নার বারো জাতহানর পরিচয়উ নাথার। এ ব্যয়-বহল কঠিন কর্মহান আতে করানির একমাত্র উদ্দেশ্য আমার বিশ্বপ্রিয়া মণিপুরী সাহিত্যরে সাহিত্য জগতর থঙচিলে ফৌকরে দেনা।

১লা মাঘ, ১৪১১ সন

গুৱাহাটী

শংকর সিংহ

প্রকাশক

অপরূপা

মণিহার সিংহ

নুমারতৌ যানা, অপরূপা, তোরে এড়াদিয়া।

তোর বানা, তোর নুশি হাবি বেলা দিয়া।।

পাহিয়ার এলা	কোকিলর সুর
তমালর নাছ	গিয়ার নুপুর।
বৌর বীনাধবনি	বরন রিনিঝিনি
মেঘর ডব্ববর	বিজুরী চমকিনি।

মেঘে লুকালুকি রাতিকার বসন্ত পূর্ণিমা।

খোয়া খোয়া শরতর লিক্ লিক্ স্নিগ্ধ নিলীমা।।

দিবাকরে ভাল	পহর দিনর
তেরাশাং রাত্তি	রূপ জোনাকর।
নীলুয়া সাগর	চৌর তুলো খেলা
তুবন জুড়েছে	ফুল বনে মেলা।

শেষ শুভ গিরি শূন্য মালা তরবর রাশি।

শস্য-শ্যামল ধরা নৃত্যময়, কলেবরে হাসি।।

জননীর মেহ	প্রেমসীর মায়া
নিঙলর গ্রেম	কিশোরীর কায়া।
লাজে ভরি পারা	নদন বহক
কঙালা কেথক	কনাক বনক।

শতরঙে শতরূপে মোরে আহত মোহিয়া।

মুক্ত পথ, মুক্তি নেই যেইমুগা নিকুলিয়া।

নউ নউ ছউ	তুল্ তুল্ সেহা
অধরেতে সুখা	মাত্ মনমোহ।
চরনে নুপুর	নন্দের নন্দন।
বর্গর আনন্দ	বন্ধনে বন্ধন।

নুমারতৌ যানা অপরূপা তোরে এড়াদিয়া।

বানালো নুশিলো মোরে থহত হাপদিয়া।

কর্মহি ধর্ম

ফাহুদী সিংহ

‘নারদু’ ‘নাইল’ মাতানি থক নাইতে
জরম এলারে মাছি জিনাতে লাগতে।
আরতায় পারলেতে তিয়ো পারতেই,
মানুষে নুয়ারিলতা আকতাউ নেই।
আকপুরুমে নারলে নুয়ারানি নার
অবশ্যই পারতেই চানে বার বার।
চেষ্টার অসাধ্য নেই পেইতেই ফল
নষ্টিয়া থাইলে এতেই সফল।
চায়া বোয়া দিয়া যদি পানি না ডালর
গাছ আর নাউ অর থকিয়া মাঙর।

হাওয়া নেই লেম যদি খালকরর
কোরাং মিঙাল হুদা দশিগী থাকর।
মনযদি যৌ নার পরিশ্রম অসার
কোন কর্ম সিদ্ধনার সময় বিতার।
সংসার এহানতে কর্মবজ্র হান
কর্মহি ধর্ম এহান সারকথা হান।
আরাম হারাম এহান চির সৈত্যহান
কর্মরতা পটানেই এহান নীতাহান।
কর্মহি হোরকাং নার লাজনাপেই
নিজকর্মে এ সংসারে এতারা নুঙেই।
এহান হারপেয়া কর্ম যেহানৌ কর
জরম এলারে মাছি জিনাতে অকর।
লৈরিকে নাইলে বুলে হিনপানি নার
লৈরিক ছাড়াও কর্ম আছেয়ে অপার।
ডাঙড়ীয়া মানু সেহে মনে না কাদি
আত্মগারে হোরকাং অনাতে নাদি।
আতর আঙুলী পাঁচগ মামাতা নাগে
কেঙু আঙুলীর কামউ নেইতা নাগে।
পৃথিবীত জরম অছি যত মানু এতা
হাবিতে আকতা নাগে তোর সাদে উতা।
তোরে কাংনেই কর্মলো অছি কততা
ভিয়ারী কতো অছি চোরউ কততা।
ভিক্ষাতে অধম কর্ম চোর নরাধম
তোরতাতে মনুষ্য ষোণ্য উত্তম মধ্যম।
মানুষে দিতাই করে, আশা নাউ করি
নিজেই নিজর বন্ধু তার নেই জুড়ি।
সময়ে সময়র কাম মূল মন্ত্রহান
সময় বিতেরা কর্ম না করিল সমান।
কালি করতেই উহান আজিয়েই কর
হাংকা করতেই উতা এবাকাই কর।
রাবলর স্বর্গ সিড়ি এবাকাউ নাছে
মরানির কালে কিন্তু পস্তাছিল পিছে।
শুভস্য স্বীয়ম্ এহান মূল্যবান কথা
হেলায় বিনাশ এল দুর্ব্যোজন যথা।
যতনে রতন মিলে হেলায় সর্ব্ব নাশ
কথাহানি মনে থাইলে নাইতেই বিনাশ।
আটেলপার ভগবান নারনা সহায়
কর্মবিনা এ সংসারে উদ্ধার নাপায়।।
জন্ম মৃত্যু ধ্রুবসেতা ছরিতে না যার
কর্মহীন মনুষ্যউ মান্যতা নাপার।
এহান জানিয়া কর্ম যেহানৌ কর
জরম এলারে মাছি জিনাতে অকর।

প্রার্থনা

সেবাব্রত সিংহ

কিতাতে মাগুতু দেছং নাই হাবিতা
 অভাব কিস্তাউ নেই।
 ধন জন সুখ শান্তি কুটুম কাষা হাবিতা
 এ ভুবনে পেই পেই।
 নাউ চেয়া ত্রিভুবন জরম ঐতেয় পাছু
 কার্পণ্য নাউ করিয়া।
 বাসনার সীমা আছে ষৌনাপেয়া বুজ্জে আছু
 হীন নাদিং মাগিয়া।
 চরনে শরণ দিছ তোর নাঙ লনা দিছ
 শেষ দিন হানি পেয়া।
 শোক দুখ জরা ব্যাধি আপদ বিপদ বিষ
 থছি নেনা না মনেয়া।
 হৃদি মন প্রাণ মোর থতা আহি কান জোড়
 তোরাং অর্পিত থাক।
 ধরার ধূলির' পরে সাজারাং করে মোরে
 দেহা উপেই জিরাক।
 অপার সুমুদ্র জলে ধক্ ধক্ বালিচরে
 নাউ করিছ সহায়।
 এহানে বিনতী মোর চরণ যুগল তোর
 ছকৈয়া ঐং বিদায়।
 ধরে নাউ থই মোরে উবা নাউ করি মোরে
 পারিতাপ মোর নেই।
 পড়লে তোরাং করে গুহিলে তোরাং ধরে
 বাঙ্কা মোর এহানেই।
 নাউ তুলি স্বর্গে মোরে নাউ মেলি মৈর্তো মোরে
 নরকে আপত্তি নেই।
 জনম জনম ধরে মিনতী করুরী তোরে
 থাইং তোর চরনেই।

আর জনমে ইমা

বিভূতি ভূষণ সিংহ

যুগ পাঁচহান লালকরে দিলে
 লেম্পালে থকে উড়ে মুরে তুলে
 কিতাহীন দুখ নাউ বাগাছিলে
 নাউ মাগেছিলে আকতাউ।
 এবাকা চাউরী, কিতা দিলু তোরে
 ছিড়া তেনা খানি দিয়াদিলু মুরে
 আহির পানী, কাদাছিলু তোরে
 উতার বাহিরে আকতাউ।
 মনাছিলু আকদিন বুজাদিতৌ
 হোনারুপা মুকুতালো হাজাদিতৌ
 হাগর তেরা ফেন ধুনুক দিতৌ
 পুংনিঙ হারৌ করিয়া।
 ঘরে কোণে কানে বিশ্ব মাঝারে
 পাছিলু যততা নগরে বাজারে
 আনেছিলু তোরকা বুজ্জে করজোড়ে
 অসুড়ে নিলাগা কাড়িয়া।
 মানুর ইমারে চা ঐশ্বর্যশালিনী
 বীনা-বিন্দিত শ্বেত শুভ্র ভামিনী
 কমলাসিনী শ্বেত হংস বাহিনী
 শুভাসিনী বারো সুহাসিনী।
 এ জনমে নাইল তোরে দেনা পূজা
 খুচু-খুল্লেই দিছ দশ ভূজা
 অসুর এতারে করিঙ নে কুজা
 কালি কলমষ নাশিনী।
 যুগ এহানতে লালফামে জিতৈগা
 হয়ত লালফামে মিয়ৌ মরতৌগা
 নুয়ালাম করে তোরেতে নিতৌগা
 যেপেইত অসুর নেই।
 যত সাধ হাজেইয়া মিটেইতৌ
 ময়ুর পোখম পারিজাতৌ দিতৌ
 মনি-মুকতা জিঙে জোনাকৈতৌ
 স্বর্গত যেতা যেতা নেই।

“চালে কৌরা না বহিতাই। বিয়ান্ত উঠিয়াই যে বদ্বালা গান্ধরাই এবাকা পেয়াউ না লমছে। আকৈয়া জীবই জারে পারিলহান নাছে। মানু আটানি পেয়াউ হীনপেইলা। পথর মানু, বারার মানু, খানিতে লাজপেইবায় নাই। তুমিতে নৌরল আহানর বেইবুনিনা, হতীনা ঐলায় বুলিয়া উহান পাহরলাইতা। তোমার এহানতে আকৈয়া তুকুচা পকৈল।” দীঘালা নন্দেশ্বরদায় ইমা চাউবী বারো সেনারেখীয়ে গুজুরের।

সেনারেখী বারো ইমাচাউবী মাংগন চাউবা খুড়ার নিঙল ছৌগী। মাংগন চাউবা মুনি জিপুত না পেইয়া দৌ অছিল। জেঠী নিঙলগ ইমাচাউবীরে, পুলিশ হুকু সৌর তুল বিয়াদিয়া ঘর জামাই থছিল। ঘরে থাইতে থাইতে হুকুসৌয়ে হালীনক সেনারেখীয়ে দাপদুয়েইয়া থছিল। মাংগন চাউবা খুড়া, মোহিনী খুড়ি, দ্বিয়োগী দৌ অনার দশ বছর পিছে হুকুসৌও দৌ অছিল। ঔপেইংত দ্বিয়োগী হতীনর কৌলী। নন্দেশ্বরদায় মাতের -

“মৈলে আকতাউ নান্তারাইগা। ভাই-বন্ধু আর কুটুম্ব কাবিল। স্বপনেকী ছায়া রে স্বপনেকী ছায়া। মাটি বাড়ী আর কাঞ্চন কায়া দুদিনকী মায়ারে, দুদিনকী মায়া। খুড়ায়তে নিলগাতা? না হুকুসৌয়ে নিয়া পারেছেতা? হাবিতা বেলাদিয়া গেলগা। আইতে লেংটা যাইতে লেংটা। লাগিয়া কিহান কানা। যেতা আছে বাটিয়া খেই। বি-সইয়ো কমতা নাইগে। মুঙে পিঠিত সড়ক লাগিয়া চেপ্টা দ্বিচিরি। হাল দুগতে ঐতে। পাঞ্চায়ত তিল করিয়া গাঙর বুজন দুগ আগ ডাহিয়া হাবিতা বাটে বেলেই। ষাটোনা আলাদা খাও, তেবউ বালায় খাও। নিক্তিকার কৌলী খান্না নুঙেই নেই। ঔনাপাহান ঐলগা। এবাকা এড় নন্দেশ্বরদায় তানুর নিক্তিকার কৌলী-খান্না দেহিয়া হীনপেয়া মাতের -

“দৌয়েউ কৌলী করিয়া পার না পাছি। তুমি তে মনিষ্য। উতারমা অবলা। তোমার কৌলীর হাদিৎ ছৌগিয়ৌ হিন্ পেইলা। তানুর মনেউ বিব বরাদিয়া হদেইলায়। লক্ষী-বিষরীর কৌলীত চান্দ সদাগর হাত ঘাটর পানি পিয়া লৈলাট অছিল। ধন-সাম্পাল হুনা-রূপা আদি হাবিলো চান্দর ডিঙা বুল্তারা নৌ হাতগী সুমুদ্রহানাত বড়িয়া তা ভীম পিতৃ অছিল। মোয়েই জিপুত হাবি উদখার ঐয়া দেই দেই হারা দেখিলা। লাগিয়া থাইলে তোমার সম্পত্তি হানৌ মাঙেতে। ছৌও দেই দেই হারা দিতায়। যাকরলে মি পাঞ্চাইং ডাহে দিঙ, পরগণার বুজন কতগীয়ে তিল করে দিঙ। তোমার এহান লেকরে” ইমাচাউবীরে ডাহিয়া মাতলো -

— “হজক আক্ কারী দে।” সেনারখীয়ে মাতলো -

— “তি চাহা আক্ খেরী আন, মুড়ি কতগীয়ে দিছ।” মতিয়া মাংকল হানাং কাইয়া খুটি পিড়হান আচুল দিয়া লিঙেয়া বহিল। নন্দেশ্বরদায় আজি কৌলী এহানর শেষ-মেব আহান করিয়া যানা মনেইল।

বেনী বলিয়া উবা উবা ঐয়া থতায় থতায় টেকারা টেকিরি দিয়া ফোচ্ ফোচ্ করিয়া লাগিয়া থাইতার, আলদ জুরি, মুরে পানির ছিক্ লাগলে যেসাদে ডপ্ক মটিত পড়িয়া ফেৎক খেইয়েয়া মাঙ পরতারাগা, সেনারেখী বারো ইমাচাউবীয়ে নন্দেশ্বরদার কথাত উসাদে

ফেৎক ঘরে হমেইলাগা।

মুঙর পথগদে বাবাংদা যারগা দেহিয়া নন্দেশ্বরদা বহানিৎত উঠিয়া মাংকলে থাইয়া লৌদিয়া ডাক্‌দিল -

— “বাবাংদা! অ বাবাংদা! কুংবেদে পাপ বেলাছৎতা। মিক্ কুপ আহান বয়া যাগানে। হৈপৎ পড়েছেতা? সেনারেখীয়ে চাহা বহাছে। আক্‌ছিটা পিয়া ঐগা। মিয়ো যানা আছে। আকতা ঐয়া যিক্‌গা। নারগ হোয়ার করিয়া সেনারেমবীরে মাতলো -

— “সেনারেমবী! বাবাংদারতাউ চাহার পানি আক্‌ছিটা ঠে করে বরা দিছ।” বুলিয়া বারো খুটি পিড়হানাং যুৎকরে খুটা লিঙেয়া বহিল।

বাবাংদা দাড়িগৎ কানায় নন্দেশ্বরে কথাহান অকরল - “তানুর নিক্তিকার কৌলী এহানর সুলেই আহান করেদেনা মনাউরীতা। তি কিতা বুলর।” নন্দেশ্বরে বাবাংদার মতামত বিছাড়লো।

বাবাংদার কথার দাম আছে। তা-তিপারার বিশালগড়েৎত আয়া খংপালে লামহেইলো লামলোয়া বসতি করেছেগ। চেং, তার কথার হের ফের নার। তারে লামহানে যাকরতার। বাবাংদায় মাতের -

“অতি উত্তম কথাহান। পরোপকারী উপাসতে। মানুর হোভা করানিহান দৌর লিপ্সাহান। কিহানাৎতে লেপ করলে?” বাবাংদায় নন্দেশ্বরদার কথাহান ঠিকপেয়া পথিহান হারপানি মনেইল। নন্দেশ্বরে পথিহান বাগেইল -

“পঞ্চায়েৎ তিলকরতো। পরগনার বুজন কতগীয়ে তিলকরতো। আইব লাংমইছিঙে কৌলীহানর জরগ পেয়া ফুৎফাৎ করানি।” নন্দেশ্বরদায় কোনকিতি কুকুম নাথৈয়া কথাহান খোলাসা করল। বাবাংদায় নন্দেশ্বরে বাখান করিয়া মাতের -

“শাস্ত্রর কথাহান মাতলেহে নন্দেশ্বর। জ্বি, হরপর হু, নুয়ারার জর, নিখুল করানি থক। কাফাম থাইলেই এতা বিয়ার। কৌলী এতা জ্বি। থাইলে বৌয়ে বানায় উস্কেয়া গরং গরং লাগের। কিন্তুউ নেই কথাহানলো কৌলী লাগিল হানতে রাবলর হনার লক্ষা পুরীহান অনুমানে জ্বি লাগেয়া ছালি কালি কৈল। রাবলৌ স্ববংশে ধবংস ঐল। রাবলে হরধনু ভঙ্গ করে নুয়ারল, রামে পারিয়া সীতারে পেইল। তিক্‌হানে রাবলে সীতারে হরিয়া হুকানা কৌলীহান হাঙ্‌ইল। ফলহান, লঙ্কাউ পুড়িল, রাবলৌ মরিল, সীতাউ হারিল। জ্বিয়ে হুড়াক পুরের, কৌলীয়ে তাপিঙল মারের।

সেনারেমবীয়ে চাহা দ্বি খেরী আনিয়া দিলী। ইমা চাউবীয়ে হজকারী আনিয়া মাংকলে নন্দেশ্বরদার কাদাং থদিয়া ছাড়েই হংকরানিরকা লাখাং টুমা আহান আনাত গেলিগা। বাবাংদায় চা পিয়া মাতের -

“চেই মা! বি-ছে মাটি-বেটী এতা কলঙ্কর ঘটী। এতাৎত কৌলী অর। এতাৎত পারিল মাহি দুরেই থানাই হোভা। তারো, নন্দেশ্বরর কথাহান

ইল। কৌলী মিটাতেই।” ইমা চাউবীয়ে গারগ ঠিকদিয়া মাতিরী -

“মি হাতবুলাদিয়া ঘর পাতেছুগ, তেই দাপদিয়া খুঙছেগ। বাবায় ঘর জামাই থৈয়া সম্পত্তিহান মোরে দেনার কথা। তেই বিয়া-এয়া ঘর পাতানির কথা। ডকাড্ বাণ্ডরায় দাপদুয়েইয়া এ জঞ্জালহান বাড়েইলতা।” বুলিয়া দৌর খয়া পাছেগা তেইর গিরকরে খানি আচুলে বেললী। বাবাংদায় বুঝার-

“তুমি মনিছৌগী ঐলাই ঐছ, সম্পত্তিহান মান্না করে দ্বিভাগে বাটিয়া পেইলায় ঐছ।” হানী ফাৎনেই, ইমাচাউবী চিকারী দিয়া উঠলী- “মি জেঠীগ, ইমা বাবার সেবায়ত্ত করিয়া আছগ। তেইরেউ মি পালেছুগ। ছৌ ছুমার এতার শুমং নিকেইয়া মি ডাঙর করেছুগ। তেই ডেং ডেং করিয়া হুদা বুলে বুলে আছেগ। বিনি বিনি বুলতে বিনকরাং থুঙলী, ঘরগৌ জ্বি লাগেইলী। এবাকা সম্পত্তিহানো বাগানিত থেঙলী। মি তেইরে জিঙে। মি জিঙিয়া থাইতৌ।”

বাবাংদা কতহান চিন্তা করিয়া থাইল। কিহান তে মাংত। দৌর জিঙা জিঙির খেঙনা বাগে নুয়ারিয়া স্বয়ং ব্রহ্মা, বিষ্ণু, মহেশ্বর পেয়াউ বিপাকে পড়েছিল। রাধা বিরজা, সত্যভামা-দ্রৌপদী, গান্ধারী - কুন্তী, যুধিষ্ঠির - দুর্যোধনর কৌলীত ভীষ্ম, দ্রোণ, বিদুর কত লায় লাঞ্ছনাত পড়েছিল। তাতে কিত্তাউ নেই, টেইপাং মানুগ। কিন্তু বাবাংদাউ লামহেলৈয়া লাম-লছেগ। কিত্তাউ নেই, ইমাচাউবী বারো সেনারেমবীর কৌলীহান বাগে নুয়ারলে, তার লামহেইবা নাংহানর কি দাম?

দীঘলা নন্দেধরে আহিগী পিট পিট করে বাবাংদারে আকখুরুম চার, ইমাচাউবীরে আকখুরুম চার। ইমা চাউবীর গজে ছৌএয়া আহের। চাঙেৎত আক বিরিগাহান দেহিয়া জারে নুয়ারিয়া মাতলো-

“ইমা চাউবী! রাম গার ঠিকদানি হবানেই। পেটকো বাগের। হুকানা রুক্ নল্ নার হাইহান, কিন্তু বাগের। বাবাংদায় হবা কথাহান মাততে নলৈয়া স্নাকর। জেঠীগ অছং, পালেছং। খুলাখুলি এতারে হোতা করে থনা এহানেই জেঠী-জেঠীর কাম। তি তে উষ্ট্র হানেই মাতুরী। কথা না ডেমেই। বাবাংদার কথা ইল। এহানেই তোর হবা হান।” বাবাংদায় নন্দেধররে খামকরিয়া মাতের “মি যারী আহান দিং হনো। সরালেল, অগ্নিদেব, বৌ রাজা তিনযোগীয়ে কুংগয় জিঙে এহানলো কৌলী আহানাং থেঙলো। হাবিয়ে হারপাছি, সরালেল স্বর্গরাজ্যে দৌরফামে রাজাগ। তেবৌ, এ দ্বিযোগীয়ে তানু জিঙে বুলিয়া হুকানা কৌলী এহান বাগেদেনারকা ব্রহ্মা গিরকরাং ফৌয়েলো। ব্রহ্মায় মাতলো - “কুংগয় ডাঙর মি মাত্তৌ যদি তুমি উরে বৈয়া আছে বুড়া বুজন উগর পরিচয়হান মোরে আনিয়া দিয়া পাররায়।”

অগ্নিদেবয় বুড়া বুজন উগরাং গেলগ। মাতলগা-

“মি স্বর্গত থাউরী অগ্নিদেব। মি হাবির গজর দৌগ। মি তাপ দিয়া বিশ্ব ব্রহ্মাণ্ডগো জিত্তা করিয়া থছ। মি মনেইলে জ্বিয়ে পুড়িয়া বিশ্ব ব্রহ্মাণ্ডগো ছালি করে পারুরী। আপনার পরিচয় হান দিক্।” বুড়া বুজন উগোয় অগ্নি দেবরে খানি চেইল। মাতল -

“অ উপৈলু। আপনে হাবির গজর দৌগ। মনেইলে পৃথিবীহান হারখার করে পারিয়ার। এরে দুগ ঘাসর মারা এগাছ পুড়িকতা। অগ্নিদেব ছৌয়েল। খাণ্ডব দাহন করেছে, লঙ্কাদহন করেছে, এগরাং ঘাসর মারা এগাছ থদিয়া বুজন এগয় পুড় তা চেইঙ বুলের এহান, মোরে কন্তি তিস্লাই করেরতা খাল্ করিয়া আইৎতে দেখয়েইং বুলিয়া তার লক্ লক্ করের সহস্র জ্বি লাগেইয়া মারাগাছ পুড়ানীত গেলগ। অস্তি ক্ষুদ্র তৃণ শিকড়-খণ্ড অনায় জ্বি এগ মারাগাছ ফৌয়ো নুইল। বারার হিলে মাটিয়ে জ্বিগ থেপৈল। অগ্নিদেব লাজপেয়া আল গেলগ। ব্রহ্মায় আকতত্তি না মাতলো। বৌ-রাজায় অগ্নিদেবরে আহিয়া তিস করিয়া ব্রহ্মারাং মাতলো- “ইপুখৌ! অগ্নিদেবয় নুইল হানতে পরিচয়হান আনাং মি থিংগা বেনাই।” ব্রহ্মায় “হবা আছে যাগা বুলল।” বৌ রাজা বুড়া বুজন উগরাং গিয়া মাতল গা -

“আপনার পরিচয়হান দিক।” বুড়া বুজন উগোয় বৌরাজারে আকখুরুম মিলেং আহান দিয়া মাতল-

“আপনে কিসাদে আছিতা মোর পরিচয়হান আংকরিয়ারতা?” বৌ রাজায় পরিচয়হান দিয়া মাতল-

“মি স্বর্গর দৌগ। বৌ-রাজা বুলতারা মোরে। মি অন্তরীক্ষে বিচরন করুরী বুলিয়া মোরে মাতরিশৌ বুলতারা। মি মনেইলে পৃথিবীর হাবিরে উড়েইয়া মোর লগে অন্তরীক্ষে নিয়া পারুরীগা।” বুড়া বুজন উগয় ঘাসর মারাগাছ দেখয়েইয়া মাতল-

“অ, উপৈলু। আপনে হাবিতা উড়েইয়া নিয়া পারিয়ারগা। চেইঙতা এরে ঘাসর মারাগাছ উড়েইয়া নিক্গাতা।” বৌরাজা মনে মনে আহিল। পৃথিবীর ঘর দুয়ার, গাছ বিরুখ, বন জঙ্গল ভাগিয়া উড়েইয়া নেউরীগা এগরে কিত্তাউ নেই, ঘাসর মারাগাছ উড়েইয়া নেনার কা মাতের তা। কি বুজনগ ঐলতা। খানিয়ৌ ছৌয়েল। ছৌয়েয়া নিজর মূর্তিগ পালৈয়া উনপঞ্চাশ বায়ুলো ঘাসর মারাগাছর কদাং ফৌয়েইলগা। বৌহানে ঘাসর মারাগাছ দুরেইং ছেচিয়া গেলগ। বৌরাজা বারো ঘাসর মারাগাছ তালকরিয়া গেলগ। ঘাসর মারা গাছ বারো দুরেইং গিয়া পড়িলগ। ঐতে ঐতে বৌরাজা টুয়েল। মারা গাছ উড়েইয়া নিয়া নুইলগা। আলৈয়া মুরগ খাজুরা খাজুরা বুড়া বুজন উগরাং আহিল। বুড়া বুজন উগৈ মাতল -

“আপনে ঘাসর মারাগাছ উড়েইয়া নিয়া নুয়ারলাংগা হানতে মোর পরিচয়হান নাদতৌ।” বৌ-রাজা আলথক ব্রহ্মারাং গেলগ। ব্রহ্মায় মুক্ছি আহান দিল। কিত্তাউ না টটরল।

অগ্নিদেব, বৌ-রাজা, দ্বিযোগীয়ে বুড়া বুজন উগোর পরিচয়হান আনে নুইলা দেহিয়া সরালেল চিত্তাত পড়িল। কিসাদে বুজনগ থাং এতায় পরিচয় হান আনে নুইলাতা। ব্রহ্মায় আকখুরুম সরালেলরে চেইল। কিত্তাউ না মাতলো। সরালেলর বুকগ দুক্ দুক্ করের। এবাকাতে তা যানা নাই। সরালেলে খাল করিয়া কুল না পার। সৃষ্টিকর্তা ব্রহ্মায় পরিচয় পানা মনার। স্বর্গর দৌর হাবিরে মি চিনু। অসুরর তুলো যুদ্ধ কৈলু হানতে তানুরেউ চিনু। শ্রীকৃষ্ণর তুলো গোবর্দ্ধনে থেঙছিল হানতে

তারেউ চিনু। এ বুজন এগো, বেগরে ব্রহ্মা গিরকেউ না চিনেছে। এগ কি সাদেগ এলতা। সরালেল হুমে করেউ পরিচয় পানার আকাঙ্ক্ষায় অস্থির এল। বুড়া বুজন উগরাং বুলিয়া গেলগা। ফামে গিয়া চার বুড়া বুজন উগ নেই। তার ফামে বৈয়া আছে ঐশ্বর্যময়ী অপরূপা হৈমবতী উমা। সরালেল, তেইরাং ভক্তি কাংকরিয়া আংকরল-

“হে মাতৃ স্বরূপিনী হৈমবতী ইমা! এপেইং বৈয়া আছিল বুড়া বুজন উগ কুরাং গেলগাতা? বুজন উগ কিসাদেগ মি হুমে করে তার পরিচয়হান পানা মনাউরী। মোরে গিরক উগর পরিচয় দিক।” সরালেলর অহংকার বিমুক্ত হাদিলো হারপানি মনাছে ভাবহান হারপেইয়া হৈমবতী উমা সরালেলর প্রতি সদয় এলী। পরিচয় বাগাদিলী- “অ, বুড়া বুজন উগ আর কুংগৌ নাগে স্বয়ং ব্রহ্ম। মোরে, তোরে ব্রহ্মা, বিষ্ণু, মহেশ্বর হাবিরে সৃজন করেছেগ এগ ব্রহ্ম।” সরালেল হারপেইল। হৈমবতী উমা গিধানকরে ঠেং টিং দিয়া হমা দিল। উঠিয়া চার হৈমবতী উমা নেই। বুড়া বুজন উগ ঐ ফামে বৈয়া আছে। সরালেল সাষ্টাঙ্গে বুজন উগর জাহান্নাং পড়িয়া হমা দিল। উঠিয়া দেহের বুড়া বুজন উগৌ নেই। সরালেল, ব্রহ্মারং আলথক অহিয়া বাগেইল। ব্রহ্মার মাতলো-

“অগ্নিদেব, বৌ-রাজা এবাকা কারে হাবিস্ত ক্ষিণ্ডে ডাঙর দৌগ মাততু। তুমিতে অহংকারে মন্তু এয়া পরিচয়হান আনে নুইলায়। সরালেল নিজর ডাঙরিয়া হান বারাদে থৈয়া, অহংকার উড়া বেলেইয়া হুমে করে অন্তরগ যৌয়েয়া পরিচয়হান পানা মনেইয়া গেলগা হানতে পরিচয়হান শেইল। অহংকারে কর্ম করে নুয়ারতার। উগ, কোন কালেউ

ডাঙর অনা নুয়ারের। মি ডাঙর মি জিঙে এহান নিজে মাতানি থক নেই। অন্য মাতলে হবা। “সরালেল, অগ্নিদেব, বৌ-রাজা তিনগিয়ে ব্রহ্মারে হমা দিয়া পড়লা, “ইপুথৌ আমারে ঠাককরে দে। আমি হারপেইলাঙ স্বর্গরাজ ইন্দ্র, সরালেল গিরক, হুমেউ ডাঙর। আমার হাবির গজরগ। উহানে স্বর্গরাজ বুলতারা।”

য়ারীহান দিয়া বাবাংদা উঠিল। নন্দেশ্বরদায় বাবাংদার তুলো যানারকা উঠিল। নন্দেশ্বরদায়, বাবাংদায় দ্বি আক কাকেই বেলেউই ইমা চাউবী বারো সেনারেমবীয়ে তানুর জাহান্নিত হমা দিয়া পড়লা মাতলো-

“বুড়া গাছিয়ে যেহান হবা ঐব উহান করে দেই। আমার মনানি না মনানি কিতা। বুড়া গাছি থাইতে আমার হীন কিতা আছে। হাদি হাদিং বুড়া গাছিয়ে এসাদে জাঙর ধুলি থানি আমার ঘরে বেলাদিও।” বাবাংদায় মাতলো -

“ইশ্বর তোমার দ্বিগীয়ে মঙ্গল করক।” নন্দেশ্বরদায় মাতের- “চান্না, মান্না এয়া থানা হানেই শান্তি। বুদ্ধি-লৌশিং পাল্পা মানু কৌলী-গালী না মনেইতারা। শান্তি নিজে বিছাড়ানি লাগের। আমি হুদা পথ দেখ্যানি পারিয়ার। মায়া-মোহ-লোভ-হিংসা, অহংকার দেহাগং থনি নাকরের। এতায় শান্তি দুরেই করের। কৌলী-খান্না য়েপেই নেই, উপেই শান্তি বিরাজমান থার। তিলেয়া তালিয়া থানাহানেই শান্তি।”

ইমা চাউবীয়ে হারপেইলী শান্তি কুম পেই। সেনারেমবীয়ে কলকরিয়া ঘরে হমেইতে হমেইতে মাতলী, - “শান্তি এপেইং”।

সুনামী (Tsunami) সংবাদ সাহিত্য

পরমেশ সিংহ

“দাপ্দেই দাপ্দেই, টেঙারা ভাহিয়া দিয়া আহের, জাতেইয়া মারতে”।

তুহিনায় লগরতারে লৌদিয়া মাতে মাতে নিজেউ পড়িং মরিং দাপদানি অকরলি। কিন্তু বিধি বাম শামিম হোটেলগ কৌও নুইলিগা। Aceh সী বীচে সাগরর চাউয়ে ভাছয়েয়া নিলগা। আজিয়ারো বিছাড়েয়া না পেইলা।

২৬শে ডিসেম্বর ২০০৪ ইংরেজী লাংমইছিংর বিয়ান সাড়ে ছয় কি হাত বাজিত সাগরর প্রলয়ংকারী ঢউয়ে হুদা তুহিনা নাগে, হাজারে বিজারে মানু, দক্ষিণ পূর্ব দক্ষিণ এশিয়া পূর্ব আফ্রিকাত ভাহিয়া গেলাগা। পৃথিবীর এ লামহানিত ১,৬০,০০০ গজে মানু মরলা, ৫০০০০০র গজে মানু ক্ষত বিক্ষত এলা, ৫০,০০০০০ র গজে মানু গৃহহীন, ভূমিহীন এলা। ১৯৬৪ ইংরেজীর পিছেদে এসাদে প্রলয়ংকর উতাল সুমুদ্রর লহরী মানব ইতিহাসে এবাকা পেয়া নেই।

“পা-পা, পুল্ মি! আনটি হেল্প মি!” ইডানবির বুকফারা আর্তনাদ বাপক টিয়ংসাইন সোয়াইন, পিয়নক মাটি লিয়ংকিনার সোয়াইনর কানে ফৌয়নির আগে দৈত্য ঢউয়ে কনাক-কঙলা ইডানবিরে

গিলিয়া নিলগা। অ্যাপলোত নুয়ারা চানারকা গেছিলগা মেঘালয়র পরিবারর চারিগ মানু, মাদ্রাজর মেরিনা সী বীচে সুনানী দৈত্যর নংমেইছিংর বিয়ান ৯টা ১৫মিনিটে নিয়া গেলগা।

সুনামী, ভূমিকম্প উঠের সাগরর প্রলয়ংকারী ঢউর জাপানী নাংহান। ১৯৬৪ ইংরেজীত আলাস্কাতে ‘সুনামী’য়ে নিংশিংর দিনে পৃথিবীর বুকুত পয়লা তাণ্ডব দেছাছিল। উপেইং ভূমিকম্প অছিল ৯.২ ম্যাগনিচুডর। ২৬শে ডিসেম্বর ২০০৪ ইংরেজীত রবিবার বিয়ান ৬-৩০টা ৭টার হাদিগং অছিল ভূমিকম্পহান ৮.৯ ম্যাগনিচুডর। অছিলতায় ইন্দোনেশিয়ার সুমুদ্রর বান্দা আইচর সুমুদ্র তলে, ভারত মহাসাগরে। তার প্রলয়ংকারী ঢেউ আন্দামান নিকোবর দ্বীপমালাত ফৌয়ছিল বিয়ান ১০-১৫মি: ১০-৩০টা। মাদ্রাজ উপকূলে ফৌয়ছিল ৯-১৫ মিনিটে। শ্রীলঙ্কাত ফৌয়ছিল কাদাকাদি ১০টা।

“কোরাং যিটাংগা কুংপেই থাইতাং? এবাকাউতে ভৈচাল অর। সুমুদ্রর ঢউ আহের।” বুক চাপারা চাপারা কাদে কাদে বিলাপ করেছিল সুমাত্রার মানুষে।

এ ভূমিকম্পত উঠেছিল সাগরর ৩০-৩৫ ফুট ঢউ ‘সুনামীয়ে’

ধ্বংস রচাছিল দক্ষিণ, দক্ষিণ-পূর্ব এশিয়ার ১৩হান দেশে। হাবিবন্ত মিয়াম ক্ষতি অছিল, ইন্দোনেশিয়াত, দ্বিতীয় শ্রীলঙ্কা, তৃতীয় ভারত। ভারতে হাবিবন্ত মিয়াম ধ্বংস অছিল আন্দামান নিকোবর দ্বীপ পুঞ্জ।

“এবাকা পেয়া ১০৪০০০ মানু মরেছি ইন্দোনেশিয়াত। ৩০০০০ র গজে মরেছি শ্রীলঙ্কাত। ভারতে ১০০১২ গ মরেছি বুলতারা। অবশ্য কতদিন আগে ভারতে ১২০০০ র গজে মানু মরেছি বুলেছি। সুমনে তার কলিকাতার ঘরর বৈঠকখানাৎ বৈয়া মাতের, না মরিয়া আসপাতালে, রিলিফ কেম্পে মানুর ঘরে আছিতা কঁমলেউ আরাক ৫ লাখ ঐতাই। ঘর-দোয়ার ভাগিয়া বুড়েইয়া নিরাশ্রয় অছিতা কঁমলেউ ৫০ লাখ ঐতাই। ১৯৪১-৪৫র ২য় বিশ্ব যুদ্ধতো এমাটিক মানু না মরেছি, এসাদে ক্ষয় ক্ষতি নাছে। ইন্দ্রানীয়ে সুমনর কথাত যৌয়েলী।

“যে যে দেশ সুনামীয়ে ক্ষতি করেছে উতা, ইন্দোনেশিয়া, মালয়েশিয়া, মায়নমার, থাইলেণ্ড, বাংলাদেশ, ভারত, শ্রীলঙ্কা, মালদ্বীপ, সোমালীয়া, তাজানীকা, কেনিয়া। ভারতে, আন্দামান নিকোবর অন্দ্রপ্রদেশ, তামিলনাড়ু, কেরেলা, এতা। ইন্দ্রানীয়ে মাতিরী-

“এ কুকুর এগরে মোর জরম দেখু ছৌ এগন্তৌ জিঙে বানা পাউরী। এগয় ঢউয়ে বাছয়েইয়া নেরগা মোর মুনিছৌ এগরে তার জীবন সংশয় করিয়া পানিহানাত আচুলিয়া আনেছগ।” ইলা সুরাক্ষনিয়মে মাতিরী-

“ও বাই মোর ছৌ এগ তিনদিন গাছ আক জারীত টাঙিয়া আছিল। নেভীর মানুষে পেইয়া আনেছিতা।” কর-নিকোবর সুজাতায় মাতিরী। জিরাথ কিথু এ মাতের, “দক্ষিণ, দক্ষিণ পূর্ব এশিয়ার এ

অভূত পূর্ব প্রাকৃতিক দুর্যোগে বিশ্বস্ত মানুষে সামালানিৎ ঘর-দুয়ার হংকরেদো, চিকিৎসা, খানা-পিনা, পথঘাট এতা হংকরেদেনিরকা সারা বিশ্ব এক অয়া আহেছি। রাষ্ট্র সংঘর সেক্রেটারী জেনারেল কফি আননে ২২০ মিলিয়ন ডলারর সাহায্য দেনারকা মাতেছে। ইন্টার নেশন্যাল রেড ক্রস সোসাইটি ১০০ কোটির গজে সাহায্য করতাই বুলেছি। পৃথিবীর নানাদেশ, ব্রিটেনে ৯৬ কোটি, সুইডেনে ৮০ কোটি, স্পেইনে ৬৮ কোটি, ডেনমার্ক ৫৪ কোটি, জাপানে ৫০ কোটি, চীনে ৬০ কোটি, আমেরিকায় ২.৪ বিলিয়ন, নেদারলেণ্ডে ৩৪ কোটি ভারতে ২০০ কোটি, কেনাডায় ৩৩ কোটি, কাতারা ২৫ কোটি, ইউ এইচে ৩৫ কোটি, এসাদে সাহায্য আগ বাড়ছি।

ডিম্পি লালে মাতিরি, “খেলার জগৎ, সিনেমা জগৎ, শিল্পপতি ধনবান, বিদ্বান, এমন কি হুহু হরকাং মানুষো, যেতা পারিলতা দিয়া সহায় করানিরকা আহেছি। জেকিচানে ৫ লাখ, নতাতিলভায় ১ কোটি, সারা প্রভায় ১০ লাখ, বি.সি.সি.য়ে ১ কোটি, স্বরাজ পালে ১ কোটি, চীনা হেইমাক আহানে ৬ কোটি এসাদে এসাদে সাহায্য দেনাৎ লাগেছি।

ইন্দোনেশিয়ায় তানুর দেশহান বিপর্যস্ত ঐলেউ মনে না মরেছি। ১০ বছরে বারো নুবা ইন্দোনেশিয়া হংকরতাই বুলিয়া নববর্ষে নবোদ্যমে খাড়া অছি।

“বিধিয়ে আক্বেদে ডু-ভার হরন করের। অন্যবেদে নুবা ভুবন হংকরের। এ প্রাকৃতিক বিপর্যয়ে পৃথিবীর বিভিন্ন জাতির, বিভিন্ন ভাষা ভাষির, বিভিন্ন ধর্মর মানুষে একতার লুরি আকডালে বাঁধিয়া ফুলর মালা আকডাল হংকরেছি। এ মালাডাল আরতে না ছিড়ক।” কুইন মেক্ যেগে মাতিরী।

জারর ব্যাখ্যা আছেতা

রেবতী মোহন সিংহ

১৯৬৯ ইংরেজির নভেম্বর মাহাহান। ব্রাডিস্টকে (রাশিয়া) আমার ভারতর নেভীর-জাহাজ হংকরিল প্রজেক্ট আহানর দেহাদেনারকা মোরতা উপেইত যানা অছিল। মোর লগরতা আরতাও আছিল। এয়ার ইণ্ডিয়ার হাওয়াই জাহাজ আগরমা আমারতা যানাহান লেপইল। ঠাণ্ডা জাগাহান বুলিয়া জারর ফুতি ফালি, কিতা লাগের উতার হাবি ব্যবস্থা করিয়া যানার দিন উহান মুম্বাইর সান্তা ক্রুজর হাওয়াই অডাগৎ কালাচিঙেইহু ফৌরইলাংগা। ভারতর বাইরে যানার জীবনর পয়লা সফরহান। ভগবানরে, ইমা-বাবারে ধন্যবাদ জানেইলু। কুংগদে আহির পটগি চিঙ্গুপাগ অছে এহান মি সুপও উপনুরারেছু। এসাদে সুযোগ আহান পানাএহান জবর চিল। নিজরে জবর ভাগ্যশালী মনে করেছিল। শিলচর কলিকাতার হুকাং জাহাজে চড়িয়া, চাঙখল জাহাজ আগৎ চড়ানির ইচুদিনকার খৌরাংহান মিটিলকো বুলিয়া ঠুম-নিংশা বেললু।

হাওয়াই জাহাজগ মুম্বাইন্তু এরাডিল। নভেম্বর মাহান, হাকহান

ইশেং শেঙছে। জাহাজ এগ গজেদে কাইতেই আছে। চেইতে চেইতে ছতার ডেকি দলা-দলা মেঘর গজে ফৌরইলগা। ষিড়কীহানাদে চাউরী হাঙ্তে জাহাজগ মেঘ হানাৎ হাতুরিয়া যারগা পারা। কত ঘন্টা পিছেদে ইরানর রাজধানী তেহেরানে গিয়া লামলাংগা। জাহাজগত লুকুলিয়া পয়লাকার মোর পারাহান যেবাকা মাটিহানাৎ পড়িল উপেইত আপপানে গারিগত জিরিঙ করল পারা। চারিবেদে চাউরি হাঙ্তে অপূর্ব দৃশ্য আহান মোর নজরে আহিল - স্বর্গত পুষ্পবৃষ্টির সাদে বরফ এতা পড়ের। ঔদিনকার তাপমাত্রা + ৪° ডিগ্রি সেন্টিগ্রেড। মোর কালা কোটএহান বরফে দলাগ অইল। মোর চাকরী জীবনে কাশ্মীর দার্জিলিং যানার সৌভাগ্য নাছিল হাঙ্তে এসাদে বরফ পড়ের এহানর উপলব্ধিহান ঔদিন পয়লাকারহান। তেহেরানেও মাশেং ফৌরয়া লামলাঙগাতায় সেন্ধ্যাৎ। ভারতীয় দূতাবাসর মানুষে আমারে ওকুরলা হোবাকরে। কিন্তুমান জার এহানে মোরে বেকল করে নেরগা। তাপমাত্রা - ৪° ডিগ্রী সেন্টিগ্রেড। ০° ডিগ্রীৎ পানি বরফ অর। ফিজেং এতাই ভর না দরের। মি মুলেস্ত ও

জার খাংকরে নুয়ারৌরীগ। ব্রাজিভটক মস্কোন্ত আরাকও ঠাণ্ডা, হাঙ্গে আগেদে আহের দিন এহানি কিসাদে কাটেইতৌতা বুলিয়া জবর খালকরাং লাগলু। মস্কোন্ত ১২ ঘন্টার পথ। মনে মনে হিসাব করাং লাগেছুতা - পশ্চিমর মুখাইন্ত পূর্বর শিলচর প্রায় ৩০০০ কিঃমিঃ। পেনে সময় লাগেরতা চারিঘন্টা অথচ তানুর দেশ এহান কতি ডাঙর যে পশ্চিমোন্ত পূর্বে ফৌবয়তেগা ১২ ঘন্টা লাগের। এতাপারা সময় লাগতয় এহান চিন্তা করতে করতে কুন্সাকা পেনহানাং আহিগ জিপেছে এহান মি সুপও হারনাপাছু। মোর কাদাং বহেছে গিরক উগয় মোরে উঠেয়া মাতের মিঃ সিংহ, আমি মস্কোভাং আইলাং। উঠবেনাই!” ঘুমর আনিং শানিঙে মি খাংলাগিয়া এবেদে উবেদে চাউরী। এহানতে বার কিসাদে জাগাহান ? এপেইতে হাবাই জাহাজগর জিরানির কথা নাগয়। এয়ার হোস্টেজগরে তানুর ঠারে আঙকরলু হাঙ্গে জবাবে মাতলহানে দিনহান হবা নানার কারনে চারিঘন্টা পিছেদে বার মস্কোং আলথক অয়া আহিল পেনহান। রাশিয়ার ঠারে মস্কোরে মস্কোভা বুলতারা উহান উবাকা হারপেইলু।

কত ঘন্টা পরে রাতিকার আধারে জাহাজগ সেংকরে শূন্যহানাং রহন হানলো কইলগা। মোর কাদার সারেই- ঙারেই এতা হাবি শুঞ্জিলা। কিন্তুমান মোরতা জার এহানে ঘুম নাহের। জাঙ দ্বিয়হানি ইঙহানে অবশগকরে নেরগা। তাপনিয়ন্ত্রিত জাহাজ এগং জারপানির কারনতে নেই। তথাপিউ জার এহানে প্রবল করে নেরগা। এয়ার হোস্টেজগয় মাপ চেয়া মাতলো তাপ নিয়ন্ত্রণর মেশিনহান হবা করে কাম না করানির কারনে, বারো জাহাজগ পূর্বদিকে আশুয়ানির কারনে জারহান খানি প্রবল অয়া আহেরতা। এসাদে টটরয়ার সময় উহানাত বিমান চালকগর ঘোষনহান আহিল - “দিনহান জবর খারাপ অনার কারনে কাদার বিমান বন্দরে লামানিং পরলাং। মিকুপহানাং খবরকস বুলিয়ার, যেগ কাম্পিয়ান সাগরর কাদাং জাগা উহানাং লামলাংগা। যাত্রীহাবিরে হোটেলে থানার চৌরাং করলা। বিয়ান ফৌবয়তে না ফৌবয়তে আমারে খৌতাল দেনাং লাগলা। চালাক করে ব্রেকফাস্ট করানিরকা। টেবিলে গিয়া বইলাংগা - খানারতা চৌরাঙ করেছিটাই পরিষ্কার ভাত (Launch)। লুসিভাত খেয়া ডাঙর অসুগয় তপ্তাভাত পেয়াতে কনাকর কথা মনে আহিল। হোবাকরে খেইলু, কিন্তু মনর ভিতরে অমীমাংসিত প্রশ্ন আহান থাইলতাই কিয়া পাউরুটি নাদিয়া ভাত দিলাতা ? হোটেলর বাইরর তাপমাত্রাহান আছিলতাই - ৭° ডিগ্রী।

আমি হাবিহান ছালইলাং - এয়ার হোস্টেজগ আগে আগে আটিরি, আমি পিছে পিছে। রাতিএহান বরফ পড়ানিয়ে আকয়া বিমান বন্দরগ একেবারে দলাগ আছে - যেমন আমার বারমুনির পাকইর বিলগ পানিয়ে বুজিয়া আছে পারা। হোবাকরে আটে নুয়ারিয়ার। হেইনি- বৈনি দেব। আগরে আগয় ধরিয়া আটিয়ার তাঞ্জাউহানাং সেচরন খেয়া এয়ার হোস্টেজগ পড়ে পরলিগা। আমার গেছিগা এতাই ফাকফাকেয়া আহানি অকরলা। তেইরে তুলানিরকা গাট্রামুট্টা সরদার আগ (পাঞ্জাবীগ) আগ বাড়িল, কিন্তু তাও তুলৌরিগা বুলতে পিছলন খেয়া পড়িল। খালকরৌরিতা, যেগ এপেইত জরম অয়া ডাঙর অয়া চাকরী করিরি এগও যদি এসাদে পড়িরি হাঙ্গে আমিতে কিয়া না

পড়তাঙায়তা ? এবেদে এয়ার হোস্টেজগ উঠিয়া এগদে উগদে চেইরী। মি উপ আপ নুয়ারিয়া গিথানকরে আঙকরলু জবর চুট লাগিল তানা কি তা ? উত্তরে মাতলতায় “জাহাজগ বিসারেয়া না পেইরি।” AROFLOAT বুলতারা জাহাজ উতা এমন নিয়াম অগেছেগা বুল্মেতে আমার ভারতর এমবেসেডর গাড়ীর সাদে উবা করিয়া থছি। খবরকসও হাওয়াই জাহাজগ এরাদিল ব্রাডিভাটকরকা। ছয় ঘন্টার পথ অথচ ফৌবয়লাংগাতাই সেম্বাং। হঠাৎ ভুগোলর অঙ্ক আহান পরীক্ষাং আহিল উহানর কথা মনে পড়িল বোদাইত এতটা বাজলে কলিকাতাং কতটা বাজতয় ? তাপপ তাপপ পেনহানাত নামৌরী উপেইত খালকরলুতা কইতে আমারেতে ভাত ও নাও দিলা পেনহানাং বিয়ানে খেইলাং উতায় অইলগা পাউরী। জার এহাঙ্গে মাতানি নাকরের - জলে-নালে অপরলুগা। নাকেদে পানি আহিয়েদে পানি। উদিনকার তাপমাত্রা আছিলতাই - ১৬° ডিগ্রী সেন্টিগ্রেড ঠাণ্ডাহানে জাঙ এহানিং ছুরি কয়া আহের পারা। এমটিটর ঠাণ্ডাহান জীবনেও কল্পনা নাকরেছু। এহান হারপেইলুইস্ হনা রূপার বস্তা আহান দিলেও এসাদে ফামে মি নাইলুইস্। যেতাও অক আমার থানার ব্যবস্থাতে তাপনিয়ন্ত্রিত কক্ষ আগং চৌরাঙ করেছিলা। আস্তে আস্তে খিটখিটানিহান কমে গেলগা। আটাফিরা করানি অকরলু। গারিগ ওবাই শাঙইল পারা। রাতিহান হোবা অয়া কাটিল।

পাঠক বৃন্দরাং ব্রাডিভটকর যারী কতহান না মাতলে মোর লেখানিহান অপরিপূর্ণ থাইতয় বুলিয়া মনে করৌরি। পিছেকার দিনেও জাহাজর কারখানাং গেলাংগা, যেহানরে ইংরেজিং মাতারাতাই ডকইয়ার্ড বা শ্বিপইয়ার্ড। পয়লাই মোর নজরে পড়িলতাই (১) Crane হান (ভরি-জিনিষ তুলানির যন্ত্রগ) চালেইরীতাই হাট্টা গাট্টা বেয়াপা আগো। মনে মনে খালকরলু, এহানতে কিহান। দেশ এহানাং মুনি নেয়ছিதாக Crane উহানাং কানাও জবর হিন অথচ জেলা মানুগ অয়া কতি গজে কাছেতা ! মি পিছেদে হারপাছিলুতাই জেলৈই মুনির কোন ভেদ নেই, মুনিরতা বাধ্যতামূলক ফৌজে তিনবছর কাম করানি লাগের। পরিবারর ছৌর ভরন পোষনর ভারহান সরকাররাং। সূতরাং পড়াশুনার ব্যাপারে মালক বাপকর দায়িত্ব সুপও নেই। (২) আমি দুগয় জারহানে আমার প্রজেক্টর জাহাজ আগর থংচিলহান খুলে নুয়ারিয়া আছি তাঞ্জাউহানাং বেয়াপা ইঞ্জিনিয়ার আগয় আত আকহানলো খুলিয়া হমেইলিগা। আমি তেইরে চেয়া খাং লাগলাং। জার এহানে আমারে কুকসুমকরেছেতাকো। (৩) আমার মেসে যে বেয়াপাগ কাম করল উগ ব্রিগেডিয়ার আগর ময়লকগ। আমার ভারতে অইলইস বেয়াপা গিথানক উগ কালাচশমা পিদিয়া গাড়ী ছাড়া না আটলইস্। নৌকর - চাকরে ঘরগ বুজিয়া থাইলাইস্। আকদিন গিথানক উগরে আংকরলু, ম্যাডাম কাম এহান ‘মজবুরন’ করৌরীতা না - কিতা ? জবাবে মাতল কথা উহান ছনিয়া মি পাঙইলু। গিথানকে নাঙরকা ও নাগয়, পয়সারকাও নাগয়, হুদা “একেলাপন” দুরেই করানিরকা করিরিতা। হেয়ক ফৌজে, জিপুত হোস্টেলে থায়া লেরিক পাকরতারার সরকারর খরচে। ঘরে কতিহান আকখুলিগ থাইতয়তা ? গিথানকর ভারতীয় বন্ধু আগ, সর্দারগ, মোরতাও মারুপগ, সব সময় লাংমইচিঙর

দিনে গিয়া খাইলগা। আকদিনকার ঘটনা আহান উল্লেখ না করলে ব্লাডিভট্টকর ঠাণ্ডাহান কিহান পাঠকরে বুঝা নুবায়তও। আমি ভারতে ফিরিয়া আহানির আপেকার রাতিউহান মোর মারূপ এগয় তার বান্ধবীরে মূল্যকাং করানি। অথচ গত পঞ্চাশ বছরে না পরেছে ঠাণ্ডাহান, উদ্দিন পরেছেহান। তাপমাত্রা ৪২° ডিগ্রী সেন্টিগ্রেড, যেহান আমার ভারতের কোনগয়ও ঠাণ্ডা নাকরতায়। এবেদে অফিসার ইনচার্জগয় মরিয়াও তারে যানা নাদের। মোরে বারে বারে গেনটার, “স্যার! দে-রে উপায় আহান নিকল্যা যাতে লমইতয়কারকা বুলিয়া মি দেহা আহান করিয়া আহিংগা”। মি এগ ফাপর আগত পরলু। হায় বুলেও নুবায়েরী না ও বুলে নুবায়েরী। তার গেনগানানী এহানে, লইঅইতেগা অফিসার ইনচার্জগয় মাতল, য্যাখাং দিয়া পারতয় যদি মি তার (সর্দারগর) লগে যাউরীগা। আমি গিয়া বাসহানাং কাইলাংগা। রাত্তার লাইট পিল্লিক পিল্লিক করেয়। লামিল জাগাহান চিনে নুবায়েরী ষ্টপেজ দুগ বেলেয়া গিয়া লামলাংগা। মারূপ এগয় মোরে সাতনা দিয়া মাতের “নিয়াম দুরেইহান নাগয়, স্যার, কাদাহান না, তেল্লাম ফৌঅ পারতাজায়। “ফামহান দুরেই বা কাদা, উহান কখাহান নাগয় এমাটিক ঠাণ্ডা উহানাং আটনিহান। বৌহান জবর অইলে ঠাণ্ডাহানও জবর। বৌহানে পিছেছ ফিজেং এহানরে খালু জালু করে নেরগা। মুরগর চুপিগ যেগরে “সাপাকগ” বুলতারা উগল চেতকরে কানহানি জাপিয়া

বাধলু। তবুও মেইখঙহান জলে-নালে অইল, ঠাণ্ডাহানে। আহিদিয়গিত বরবরেয়া পানি, নাকেও পানি, করিল উপায় নেই। মনে মনে নিজরে থিকার দেনাং লাগলু - কিয়াকাও আইলুতা হেবানিয়া এগর লগে। গিখানকর ঘরগং ফৌবয়ারগা বুলতেও না ফৌবয়ার। জাঙহানিত ফুরিগ কায়া আহের পারা। আটনি নুবায়েরী মারূপ এগয় আহিয়া মাতেরতা “সাপাকগ” না পিদিয়া ও নুঙেই করে আটুরীতা। তার কথা উতা ঔসময়ত মোর কানেও না হমার। কুম্বাকা কিতা ফৌবয়াজায় ঘরে গিয়া ঝুঙইলাংগা। ইলেকট্রিক হিটার আগং আতহানি হেদৌরী। এবেদে বুজন এগয় কান উহানি হেদের। এসাদে অয়া দেখা সাক্ষাং লমকরিয়া আমি মেসে আলথক অইলাং। বিয়ান ফৌবয়তে দেহৌরীতা মারূপ উগর কানহানি কুলাহানি পারা অছে। উহানরে মাস্তারাতাই ফ্রস্ট-বাইট (বরফর নুয়ারা) তারে লগে লগে আসপাতালে ভর্ষি করলাংগা। আমার লগে ভারতে আলথক অ নুবায়ল। দ্বিমাহ পিছেদে ভারতে ফিরিয়া আহিল কিন্তু কান দ্বিয়হানি টিকিগির ডেকি কলাগ অছে। দেহিয়া মি নুমপাং অয়া তারে গালানিত লাগলু “কিহানতে লাভ অইল - দ্বিমাহা হসপিটালে থাইলে, মোরেও হিন দিলে তি ও হোবাকরে ভুগলে। উত্তরে ভগবানে যেহান করেয় উহান মঙ্গলরকা মাতিয়া মুকসি মুকসি দিয়া সেচিয়া গেলগা। আজি প্রায় ৩৫ বছর এ ঘটনা এহানরে পাখরে নুবারেছ।

দ্রৌপদী সত্যভামা

রাধাকান্ত সিংহ

হস্তিনাপুর এরাদিয়া সপরিবারে পাণ্ডবর বনাগমনে কাম্য বনহানৌ দিনে দিনে জনা কীর্ণ অয়ল বনবাসী মুনি ঋষির তাতে কথাই নেয়। কত রাজা রাজেশ্বর নিক্কা নিক্কা পাণ্ডব সন্দর্শনে আয়তারা যিতারাগা সীমা নেই। সময় আহানাং রাজা পালয়া যুধিষ্ঠিরে অতিথিরে যেসাদে অভ্যর্থনা বারো আপ্যায়ণ করেছিল, ঠিক উসাদে নইলের গাইও যুধিষ্ঠিরে বনর ফল-মূল বারো মৃগয়ালে। বনর পণ্ডর মাউ মাংসল এমন আন্তরিকতালো। তানুর অতিথি সেবা করেয়, কোন গই সেবাত কোন ক্রটি নাপেইতারা।

কাম্যক বনে পাণ্ডব আছিল। খবর লয়া পইলাই আহিল মহিষী সত্যভামারে লগে করিয়া দ্বারকাছ শ্রীকৃষ্ণ। বহুদিন পরে শ্রীকৃষ্ণর দেহা পেয়া হারৌর সীমা নেই। পঞ্চ পাণ্ডবর কিয়াকা বুদ্রে তা হুন্দা সমন্ধ সুদ্রে আত্মীয়গ নাগয়। আছিল তানুর সুখ-দুঃখর সমভোগী অয়া। সময়ে অসময়ে শক্তিমান প্রিয়সখা যেন আত্মার আত্মীয়। পিছে আয়া উপস্থিত অইলাহা মুনি-ঋষিরেল মহাজ্ঞানী চিরজীবী ঋষি মার্কণ্ডেয়। আজিকার এ সমাবেশ এহান লেমেদে না এরাদিটৌ নিঙকরল নিত্য জ্ঞানানুসন্ধানী যুধিষ্ঠিরে। তানু এমনৌ সত্যানুসন্ধানর আলোচনায় বুরলা কোনগয় খেয়ালেই

নেই সত্যভামা বারো দ্রৌপদী কিমে কিতা অয়া আছি।

রথহানাত্ত লামিয়াই সিদা গেলিগা সত্যভামা, একান্ত নির্জনে আপনমনে বয়া আছে দ্রৌপদীর কাদাত। কৃষ্ণর সাক্ষাতে যেসাদে পাণ্ডব হারৌ অছিল, সত্যভামার সাক্ষাতে দ্রৌপদীও মনর অনুরূপ সখীরে পেয়া আনন্দর সীমা নেই। যেসাদে পানীয়ে পানীত জোয়ার আনের, দ্বিয়গীর মনর মিলনেও উসাদে মুখর অয়া উঠিল।

স্বামী সোহগী কৃষ্ণ ; সোহগী সত্যভামা। তানুর আলাপ আলোচনারমা স্বচ্ছন্দ গতিত আহিল নারীর মনর কথা, স্বামীর ব্যাপারে স্ত্রীর ঔ চিরন্তন আলাপ। হতিনা মহিষীরাত্ত অকরিয়া অসংখ্য গোপ রমনী প্রেরিত শ্রীকৃষ্ণর একান্ত সোহাগ অভিলাষিনী সত্যভামায় হাদিত ফাঁক আহান পেয়া মাতিরি দ্রৌপদীরে, “হতিনালো থায়া মি মোর স্বামী আগরেল নাজেহাল অবস্থা। দিনে-রাতিয়ে মোর মনে অর, এমাটিক করে করিয়াউ মি তারে নিজরগ করে পানা নুয়ারেছ।”

“এসাদে কিয়া মাতউরিতা সখি?” দ্রৌপদীয়ে মাতিরি, “আমার শ্যামসুন্দরে তরে বানা নাপেইলে আরাক আগরে এপেই নিয়া আইলইস। বানা পার আরহে তরে লগে করিয়া আনেছেনই।”

বা ক্রোধ করতৌতা? কিসাদে করেই বা খালকরতৌতা, মোর স্বামী
পঞ্চপাণ্ডব সব সময়রকা বুলিয়া মোরাং থাকা; যদি এসাদে চাউরী
হিতে বিপরীত নাইতায়তা? উহানল

প্রণয়ং প্রতিসংহত্য নিধায়ান্নন মাঅনি।

শুক্রসূনিরহং মানা পতিনাং চিত্ত রক্ষিণী।

সত্যভামা - প্রণয়াকাঙক্ষী অয়াউ মি কোন সময় মোর আকাঙ্ক্ষারে
উদগ্র করিয়া না তুলউরী, নিজরে কঠোর সংযমরমা থয়া, বুদ্ধি
বিবেচনালো মনর চাঞ্চল্য দমন করিয়া, মান-অভিমানরে বিসর্জন

দিয়া মোর স্বামী এতাই যেসাদে মোরে পানা মনেইতারা, ঠিক ঔসাদে
তানুর সেবা করৌরি।”

তি ডাঙর কঠিন কথা আহান মাতলে। সব সময় উহান
কি সম্ভব? পুরুষ মানুর মন সব সময় নুতনর সন্ধানে বুলের।
নারীর মনউ কি ঔসাদে ঘাটর ডেকি চাঞ্চল্য নাগয়তা? উপেয়
কি কোন সময় জোয়ার নাহেরতা? যেবাকা আহের, কত বাঁধ
দিয়া তারে সামালতেইতা?” (ক্রমশঃ)

ব্যাংককে বিযুর দিনে

সুনন্দা সিংহ

“হেলো”

তেজপুর বিশ্ববিদ্যালয়েও তো মোরে ফোনে বাগেইল, হংকং এ
কম্পিউটার বিজ্ঞানর আন্তর্জাতিক সম্মেলন আহানং গবেষণা পত্র
আহান পাঠ করানিরকা তারে ডাছেছি। মোরে আংকরল তিও যানা
মনাওরিথাং?” মি মাতলু, “নিলেগাতে যিতউগানাই।” বিদেশে যানার
কথা ছানির লগে লগে মোরতা কাটাফরি দুহান নিকুলিল পারা।
মনহানতে চাকশাঙর বদাগ লালয়া হাগহানাং ফরদানিহে অকরল।
হাবিতা বিবেচনা করিয়া, শৌগিরে মোর ইমাবাবারাং থয়া আমি হংকং
এ যানাং লেপইলাং। আমি মনাছিলাংতাই সিংগাপুর অয়া হংকং এ
যানা। আমার যানার তারিখ ঔহানাং কুনো টিকেট নাপানিয়ে আমি
ব্যাংকক অয়া যানাং পড়লাং।

১২ এপ্রিল ২০০১ সন, বেলুকা দ্বিভাজিৎ জেট এয়ারবেজ
কোম্পানির বিমানহান শুবাট্টিংত যাত্রা করল। এহানে মোর পয়লা
বিমান যাত্রাহান। মি জবর হারৌ অইলু। ইলিনা বারো তথাগতরে,
মানে আমার শৌগিরে, নানিয়া আহানিয়ে মনে মনে দুঃখ পেইলু।
যেবাকা বিমানহান হাগহানাং ফরদিল ঔবাকা বিমান সেবারী ঔতাই
মাতলা — নালরানি, বেস্ট বাখদানি, দুর্ঘটনা অইলে লাইফ জ্যাকেট
পিদানি দুবারেদে নিকুলানি যত ইতি। শৌগিরে বেলেয়া আহিলাংতাই
হুংতুমেও কিতাকিতি আহান অইলে — কাদাং বছে তার নির্বিকার
মেইখংহানাদে চেয়া খামইলু। বুলাং নিকুলিয়াও এতা কথা খালকরিতা
বুলিয়ানেই গালার। মোর আতর ব্যগগং আছে বাবাই দেছিল, গীতা
ঔহান সকরা দৌরাং হবা সাকতি হবি কাংকরিয়া মনে মনে হমা আহান
দিলু। ঘন্টা আহানও না ফাখইতে ফৌঅইলাংগা।

কলিকাতাং রাতি আহান থায়া পিছেকার দিনে, ১৩ এপ্রিল
ব্যাংককে সালইলাং। কলিকাতা আন্তর্জাতিক বিমান বন্দরে আয়া
দেখলাং থাই এয়ারবেইজর বিমানহান ব্যাংককেওত লামলিহা। খানি

পিছে বরো আলফিরণ ব্যাংককে যিতইগা ঔহানাং আমিও যানা।
আন্তর্জাতিক সিকিউরিটি চেক করতে খানি নিয়াম সময় লাগের। আমার
পাসপোর্ট, বার ভিসা কিতা চেয়া লমইল আরো আমি বিমানহানাদে
যাত্রা করলাং। নিজর দেশেওত আর দেশে যানার অনুমতিহানরে
পাসপোর্ট বারো ও দেশে হমানি বারো থানার অনুমতি ঔহানরে ভিসা
বুলতারা। আমার ভারত সরকারর পাসপোর্টে আমি শুবাহাটি
অফিসেওত নিকালছিলাং। থাইল্যান্ড সরকারর ভিসাতে কলিকাতাং
আছে তানুর সরকারর অফিসেওত নিকালানি যাকরের, নইলে ব্যাংককে
নিকালানি যাকরের। এহানরে Transit Visa বুলতারা। আমি
ব্যাংককেই ভিসাহানি নিকালতাঙাই বুলিয়া লেপকরেছিলাং।
আন্তর্জাতিক বিমানহান আমার ঘরবা বিমানহানাংত প্রায় দ্বিগুন ডাঙর।
বিমানহানর দুবারহানাং বিমান সেবারী মংগোলিয় গঠনর থাই নিউল
দুগই থাইল্যান্ডর রয়্যাল অরকিড ফুলল আমার মেই গুঁককরলা।
বিমানহান যেবাকা গজে কাইলগা, ঔবাকা কতহান আসনর পারেও
বেলা বেলা চালহানাংত মনিটর আকেহগি নুকুলিয়া আহিল।
মনিটরগং দেখলুতা, আমি বঙ্গোপসাগরর গজেদে ৪১,০০০ ফুট
উচহানাদে, ঘন্টাং ৫৪২ মাইল বেগে, ফড়দিয়া যিয়ারগা। দুবার
তাপমাত্রাহান আসিলতাই ৭৪ডিগ্রি সেলসিয়াস্। আমার বিমানহান
বার্মা লালয়া আন্দামান সাগরর গজেদে যানা অকরল। আন্দামান সাগর
লালয়াই থাইল্যান্ডে হমেইলাং। পেইরাক করে মনিটরগং দেখবেইলা
আমি এবাকা থাইল্যান্ডর কাঞ্চনবারি বুলতারা ফাম ঔহানর গজেদে
যিয়ারগা। কাঞ্চনবাড়ি নাঙহান ছানিয়ে নুংশি মনহান ছেং করল।
আমারমানুর থাইনাকার লামহান নাকিতা? খানি পিছেদেই আমার
বিমানহান ব্যাংকক আন্তর্জাতিক বিমান বন্দরে লামিলগা। কলিকাতাংত
এপেইং ফৌঅইতেগা সময় লাগিলতা ২ ঘন্টা ১৫ মিনিট। ব্যাংককর
সময় চেয়া আমার ঘড়িগি ঠিক করলাং। Transit Visa কিতারকা চে

জমা দিয়া বাছেয়া থাইলাং। এ বিমান বন্দর এগ এমাটিক ডাঙর নাদেখলে ঠাচা নার। পাচ মিনিট পিছে পিছে বিমান আকেইহান গজে কার বারো লামরেছাং। আমার কলিকাতা বিমান বন্দরে আন্তর্জাতিক টার্মিনেল আকগ সিচ্চিল। এপেইং লণ্ডন, প্যারিস, জুরিখ, মিউনিক, রোম, টকিও, মাদ্রিৎ, মাস্কাত আদি নানান ফামে যারগা বিমান ঔতা বয়া বয়া চেইলাং। বেয়াপার ঔনাহান থকয়াছাং, বিমান বন্দরে আছি থাই নিঙল, বারো তানুর ফিজেরতর ঔগদে হাদি হাদিত মোর আহি পড়িল। নিঙল ঔতার সাদ, কচু বারো ফিবাম আমার মানু, মেইতেই বা আহোম নিঙলর লগে নিয়াম তিল। আকতাই মিনি স্কাট-টপ বারো আকতাই আমার আঙালুরি - ইনাফির সাদে তানুর জাতর ফিজের আকতা পিদেছি। ইনাফিহান ঠিপ ঠিপ দিয়া পারিচেৎ করিয়া যাবেকনীহান করে পিদেছি। হাদি এগং আমি নেছিলাংগা ধন ঔতার বাট আহান থাইল্যান্ডর মুদ্রা বাহটে সিলকরলাং। আমার ধন আছিলতাই আমেরিকার ডলারে। আমার ভারতর প্রায় ১.২০ রূপা থাইল্যান্ডর ১০০ বাহটর সমান। ভিসা পানার পিছেদে আমি immigration check point লালয়া green channel এদে দুবাং নিকুলিয়া আহিলাং। আন্তর্জাতিক টার্মিনেলে green বারো red দুগ channel থার। green channel এদে অধ্যাপক, ডাকতার, উকিল আদি বারো red channel এদে আর আরতা নিকুলে পারতারা। green channel এ চেকিং খানি কমর, ঔহানে তড়া অয়া নিকুলে পারিয়ার। এয়ারপোর্ট বাস আহানাং চড়িয়া আমি ব্যাংককর মূল সড়কগ সুখুমবিৎ রোড সই ২২ত আছে রেক্স হোটেল আহিলাং। থাই ভাবাই সই মানে লেইকি। এপেইর তাপমাত্রাহান, আসামেৎতও নিয়াম অইলেরগাইও, হোটেল, বাস বারো দোকান হাবি এয়ার কন্ডিশনড, ঔহানে পাং হারনাপেয়ার।

ব্যাংকক এগ নিয়াম আধুনিক বারো সিজিলর নগরগ। হপনর লামহান পারা। এগরে ইমেও কুমেইর নগরগ বুলতারাগ। ঔতার গজে ফৌঅইলাংগা দিন ঔহানতে বিঘুর দিনহান। বিঘুরে তানু সংক্রান বুলতারা। সংক্রান মানে সংক্রান্তি, থাইল্যান্ডর হাবিৎত ডাঙর কুমেইহান। ঔহানে দুকানে, ঘরে, হোটেলে, পথে, হুদা কুমেই কুমেই। জাত জাতর মানুর কুমেই, ফিজেরতর কুমেই সাজেলর কুমেই। মূলে ১৩, ১৪, ১৫ এপ্রিল, তিনদিনর কুমেইহান অইলেও ফামে ফামে ৫দিন পেয়াও চলের। নুবা বছর আহানরে থাই মানুরে মেইঙক করতারাতা সংক্রান কুমেই এহানলো। এ দিন এহানিং বেলীহান বৃষ রাশীৎত মেঘ রাশিৎ যারগা। কত বছর আগে পেয়াও থাইল্যান্ডর দেশ এহান মূলে ক্ষেতিআলা দেশহান আছিল। এ সময়ৎ ক্ষেতির ফসললো বারন বুজের, মানুর মন বুজের হারৌল। থাইনাকার দিনে এ কুমেই এহান ভারতেৎত বার্মা অয়া থাইল্যান্ডে আহেছে বুলিয়া ঔপেইর মানুরে মাংতারা। পইলা আহেছেতাই চিয়াংমাই বুলতারা ফাম ঔহানাং।


ঔপেইংত থাইল্যান্ডর বাকি ফামে সিলছেতা। চিয়াংমাই বার্মার রাজধানি য়াংগুনর উত্তর পূর্ব কোনেদে পড়ের। ঔহানেছাং আমার বিঘুর লগে তানুর সংক্রানর তিল আহান আছেতা। হাবি হিনদুখ পাছরিয়া মানু পথে নিকুলিয়া আগই আগরে অর গছাগছি দিতারা, পিচকারি, বালতিলো পানি হিচাহিচি দিতারা। থাইল্যান্ড বৌদ্ধ ধর্মর দেশহান। সংক্রানর দিনে বুদ্ধদেবর মূর্তীরে শেং পানিলো হিনাইতারা, বুদ্ধ সন্ন্যাসির সেবা করতারা, আটকে আছি জীবরে এরা দিতারা। বিশেষ করিয়া পিঞ্জুরার পাহিয়া বারো লণুকর কমর মাছ এরাডেনা এহান চলিয়া আহের রীতিহান। ঔহানেছাং আমি বলাং নিকুললাং ঔবাকা দেখলাং পথর বারাদে পিঞ্জুরার পাহিয়া, পলিখিনর ব্যাগে জিংতা মাছ বেছতারা। পথে নিকুলানির লগেলগে আমারেও পানিলো তিঙাদিলা। আমি থাইল্যান্ডর রাজার কনুঙগ চানাংগেলাংগা। তানুরতা এবাকাও রাজতন্ত্র চলের। থাইল্যান্ডর এবাকার রাজাগর নাং ভূমিবল আদুল্যাদেজ। এরে শিক্ষিত কনাক রাজা গিরক এগই আধুনিক থাইল্যান্ডর জনকগ বুলানি য়াকরের। থাই মানুরে তানুর রাজা বারো রানী গিধানকরে নিয়াম য়াকরতারা। কনুংগর মূল বারাহানাদে রাজপরিবারহান থাইতারা, ঔপেইত আমারে হমানি নাদলা, কিয়া বুললে ঔদিন রাজার পরিবারে সংক্রানর গই লাগেছি। বাকী বারা ঔহানাংত ডাঙর বুদ্ধ মন্দির আগ। ভিতরে শয়নে আছে বুদ্ধর মূর্তী আগ, নাঙহান বাট ফো। এগ হংকরানি অছেতা অযোধ্যা যুগে। ব্যাংককে অযুতথায়্য বুলিয়া ফাম আহান আছে। পুরানা ধবংসাবশেষও আছে। তানুর মতে, ঔহানেই রামর আসল অযোধ্যাহান। রাম - ১, রাম - ২ বুলিয়া রাজার নাঙও ইতিহাসে আছে। আমি মনেয়াও সময় নেয়নিয়ে অযুতথায়্য যানা নুবারলাং। রামায়ণ এহানরে কেন্দ্র করিয়াই থাই সংস্কৃতিহান হঙছেহান। কিছু ইতিহাস মতে বাট ফো মন্দির এগ হংকরেছিতাই থাইল্যান্ডর অযোধ্যা যুগে, ১৬৮৮-১৭০৩ সনে, বুলিয়া মন্দিরে হমানিরকা দেখিলা টিকেট ঔহানাংত হারপেইলু। ঔহান অইলে অযুতথায়্য রামর আসল অযোধ্যাহান অনা নুবারের। মনে অর রাম - ১, রাম - ২ রাজাই হংকরেছে অযোধ্যাহান। বাট ফো মূর্তী এগ এমাটিক ডাঙর নদেখলে ঠাচা নার। থাইল্যান্ডর বুদ্ধ মূর্তীর ভিতরে ডাঙররমা ২য়গ। মূল আকর্ষনহান অইলতাই মণিমুক্তার হাজাছি প্রায় ১২ ফুট উচ বুদ্ধদেবর চরণহানি। আর আর পর্যটকর লগে মিও ধূপ বতী বারো থামপাললো বুদ্ধদেবর চরনে হমা দিলু - বৌদ্ধ শরনং গচ্ছামি সংগম শরনং গচ্ছামি। দেবালে আছিল অসংখ্য যোগাসনর চিত্র বারো মুরাল। মন্দির ঔগর নমুনা ঔহান দেখিয়া আমার গাঙর কাঙহান নিংশিং অইলু। সংক্রান উপলক্ষে ঠোরাং করেছিলা কুমেই ঔতা চেয়া বহিলাং। ঔবাকা দেখলুতা নাছার মুদ্রা ঔতা হাবি আমার ভারতীয় নাছার মুদ্রার লগে তিলছে। আসলে থাই সংস্কৃতি এহান ভারতর সংস্কৃতির অংগ আগ।

থাই মানু এতা নিয়াম বিনয়ী। কামেকাজে জেলেই মূনির খেইনাগা ভাব নেই। বুলতে চড়েছিলাং বাস বারো ট্যাকসির ড্রাইবার, কন্ডাক্টার ঔতাত নিঙল মূনি সমানে সমানে পেইলাং। টটরতার থাই ভাষা ঔহানও নিয়াম কঙালা। খানি সুর আসুলে আসুলে টটরতার। নিঙল ঔতাই “খ্যানক যু” বুলতে প্রায় আধাআধিহে বহিতারা। মোংগলীয় ভাষাহান ঔইলেও থাই লিপি ঔতা চীনা লিপির লগে অমাটিক তিল নেই। আমার ভারতর তামিল, তেলেগু বারো ওড়িয়া লিপির লগেহে নিয়াম তিল পারা। শব্দ ঔতার অনেকগ অসমীয়া বারো আমার ঠারর লগে তিল। বিশেষ করিয়া ফামর নাঙর লগে প্রত্যয় এগ, যেমন চিটলাম, আমার আমার আহিত পড়িল। পিছে ঘরে আয়া ইনটারনেটে চেইতে পেইলাং অনেক থাই শব্দ মেইতেই ঠারে আয়া হমাছে, ঔতারমা লাম শব্দ এগও আছে। থাই খানিরমা নানান জাবজস্তর মাংস বারো সমুদ্রর মাছেই নিয়াম। প্রায় হোটেল লিকলির বয়ামে জিংতা হরপ দেখলাং। হরপর বুল তানুর প্রিয় খানিহান বুলিয়া ছনলাং। ইকইতাপীও বেছতে দেখলাং। আমিতে মাংস নাহেয়ারতা থকয়া খানা এহানলো বাক্কা হিনপা পড়লাংগা। আকরাতি ভাত নাহেয়া ফুৎকরা হরলিকস, বারো করেই খেয়া কাটেইলাং। পিছেকার দিনে ভারতীয় হোটেল আগ বিছারেয়া পেয়া ভাত খেইলাং। ভাত আকচারাং ৫০০ বাইট। ঔ হোটেল ঔগতে ঔনি আমেরিকা ফ্রানস আদি দেশর মানুবে ভারতর খানির ছাংহান পানা মনেইলে খেইতারাগা হোটেলগ। পিছেকার চারারকা সস্তা হোটেল বিছারানি অকরলাং। আমি যে হোটেল আছিলাং ঔ হোটেল কাম করের ভারতীয় কর্মচারী আগই আমারে পানজাবী ধাবা আগর ঠিকানাগ দিল। পানজাবী বুড়ীমা আগর ধাবাগ। বুড়ীমা ঔগই নিজে লগে থায়া আমারে পেট বুজে বৌবেইল। ঔপেইত ভাত আকচারাং

১০০ বাইট।

থাইল্যান্ডর মানুর উপার্জনর মূল উৎসগ অইলতাই পর্যটন। এ দেশর অর্থনীতির অবস্থান আমার ভারতেত হবা নাগই। কিন্তু ব্যাংকক শহর এগ থছি হবা এহান, কর্ম সংস্কৃতি এহান মানুর ব্যবহার আহিং নিয়াম করে পড়ের। থাইল্যান্ডর পথে ঘাটে নিঙলর চালচলনেত, ভারতীয় নারী আগ হিসাবে, মোর মনে অইল, ঔপেই অনেক নারীয়ে সতীস্তর মর্যাদা নাথইতার। এহান ঔপেইর নারী জাত এহানর গজে আধুনিক সভ্যতার শিরাপহানছাং।

১৭ এপ্রিল, ২০০১ সন, কালাচিংখেইং হোটেলগ এড়ািয়া হংকঙে যানার সালেদে আমি বারপজালো পথে নিকুললাং। নগর এগ হজাক অনার আগেই মানু আকতাই কলপুক শৌকরা সাবনর পানির গাড়ীলো পথঘাট, ফুটপাথ দনাং লাগেছি, আরাক আকতাই পানির গাড়ীলো পথর কাদার ফুলর গাছে পানী দেনাং গই লাগেছি। অ, এহানলো, নগর এগ এমাটিক লিকলিকাতা। আমি ট্যাকসি আহানলো বারো ব্যাংকক বিমান বন্দরে আহিলাং। আর কুনোদিন বারো আহানি পারুরিনেই নুবারুরিনেই বুলিয়া মোর দৃষ্টিহান যতিহান লাককরে পারের অতিহান কুপকরে চেয়া ব্যাংকক নগরীগরে মোর মনহানাং ইতু করিয়া থইলু। আমার বিমানহান ব্যাংককর মাটিহান এড়ািয়া হাগহানাং ফরদিল। আমি হংকং বুলতার। দেশ ঔহানাদে যাত্রা করলাং। বিমানহানর দুবাং লীলুবা হাগহান, ফটফট করেব বিমানকার বেলীর মিঙালহান, ভিতরে সিটহানাং বহু মোর মনহানাং আরাক নুবা দেশ দেহানির হপন। তলে সংক্রানর শেঙ পানিলো হিনেয়া বেলীহানাদে হমাদিয়া চেয়া আছে লিকলিকা ব্যাংকক নগরী।



সাহিত্য বারো সাহিত্যিক

বলদেব সিংহ

বিশ্বপ্রিয়া মণিপুরী ভারতের অন্যতম সংখ্যালঘু জাতি আহান। এ সমাজে বহু কবি, সাহিত্যিকর নাও বিভিন্ন পত্রিকাত স্বনামধন্য হিসাবে লিপিবদ্ধ অসে। সমাজের সাহিত্যিকর ভাব-ধারাও তত্তাল তত্তাল। কিন্তু সাহিত্য ক্ষেত্রে বিচ্ছিন্নভাবে থানা থক নেই, ঐক্যমূল, সংহতিমূল, সৃষ্টিশীল সাহিত্য বা সাহিত্যিক অনা লাগের, জাব-রস তত্তে হাবিরে অনুপ্রাণিত করানি লগের। এ সম্পর্কে মোর এ সীমিত জ্ঞানলো খানি পরিবেশন করলু।

সাহিত্যিকে সাহিত্যর ভাব বা তত্ত হারপানি লাগের। এতার সম্পর্কে মোর লেখা “সাহিত্যিক বারো সমালোচকর কর্তব্য” যেহান “নুয়া এলা” পত্রিকাত ‘পৃথীরাঙ্গ’ নাঙে প্রকাশিত অছিল, উহানাত বিজ্ঞত আলোচনা অছে। সাহিত্য কিতারে মাতিয়ার ? ‘সাহিত্যম্ মেলনম্। সাহিত্যম্ ভাব, ইত্যর্থ— প্রত্যয়েন নিষ্পন্নম শব্দ কল্পদ্রুম’। সাহিত্য মানে সম্যক হিত - সাহিত্য, তস্য ভাব সাহিত্য - এসাদেও অর্থ করে পারিয়ার। সাহিত্য শব্দহানেই সমষ্টি বা সংহতির মিলন। রচনাত প্রাণর কথা হিতজনক বারো আনন্দ জনক কথা হোভাকরে ফুটোয়া ইকরলে অউ রচনা হান সাহিত্য অর। হোভা ঠার অর্থাৎ প্রাঞ্জল শব্দ বরো হোভা ভাব-রস অথবা মধুর নুশি ঠার বারো শুন বাব এ দ্বিয়হানর মিলনই সাহিত্য। সাহিত্য রসাল অনা লাগের, সত্যম্ শিবম্ সুন্দরম্ অনা লাগের। অজ্ঞান আধারে জ্ঞানর মিঙাললো হিতজনক পথেদে মানবতার উবেদে মানুরে আশুবানির উদ্দেশ্যে সাহিত্যিকগোয় কলমগো চলার কবিয়ে কবিতার বীনা বাজার। সাহিত্যরমা যাবতীয় বিদ্যা হাবি চৌষট্টি কথালো বিভক্ত।

ঠার বা ভাষা ভাবর বাহন। ঠারর ফিজেদ পিদলে ভাব নিকুলের। ঠারহান যেসাদে পঞ্চভূত-পঞ্চপ্রাণ বিশিষ্ট দেহাগো, ভাবহানও উসাদে রস-তত্তে পরিপূর্ণ আত্মাগো। ঠারর মাধ্যমে পরস্পর মনোভাব প্রকাশ করিয়া সম্বন্ধ অয়া সমাজ হিসাবে বসবাস করতারা। সমাজ বিস্তারর লগে লগে স্বদেশ বারো স্বজাতির বিকাশ অর। সাহিত্য অউ বিকাশর প্রধান সহায়ক। যে দেশ বা জাতি যত উন্নত, তানোর সাহিত্যও তত উন্নত। ঠার হিকলেই প্রকৃত জ্ঞান শিক্ষালাভ অরতা নাগোয়, জ্ঞান-শিক্ষার উপায়হান মাত্র ঠার হিকানিই জ্ঞান ভাণ্ডারর দোবার স্বরূপ। যে জ্ঞান লাভ করলে বুদ্ধির বিকাশ অর, ভুল-ভ্রান্তি বারো কুসংস্কার দুরেই অর বারো জগতহানর প্রকৃত নিয়ম প্রণালী হারপেয়া কর্তব্যাকর্তব্য

নিরূপণ করিয়া নিজর বারো জনসাধারণ হাবি রকম হিত সাধন করে পারানি। উসাদে জ্ঞানর শিক্ষা লাগে। উসাদে জ্ঞান-ভাণ্ডারগো সাহিত্য ভাণ্ডার পূরণ করানি লাগের। ঠারহান অইলতায় সমাজর মালক - ঠারেসু সমাজ জরম অর। ধর্ম অইলতায় সমাজর বাপক ধর্মও সমাজর পুষ্টি বারো রক্ষা অর। ঠার বারো ধর্ম নইলে কোনো সমাজর অস্তিত্ব নাথার। ‘অপনি ভাষা কী নীর দৃঢ় কিয়ে বিনা স্বরাজকি নীর দৃঢ় হো নহী সক্তা। যে আপনী ভাষাকি সাহিত্য পুষ্টি নহী করতা, রহ অপনা মাতৃভূমিকী উন্নতি কদাপি নহী কর সক্তা’।

মানব সভ্যতার ঙ্গমোন্নতির অনুশাসনলো মানুরে নিজর নিজর সভ্যতা রক্ষা করানির দায়িত্ব বারো ঐ সভ্যতা রক্ষা করানি পালনীয় আচরন উতাই সংস্কৃতি। মানব জাতর এ সাধারণ বারো ঐক্যমূলক সংস্কৃতিই বিশ্ব সংস্কৃতি। যে আচরনে মানুরে সংস্কার করে উহানরে সংস্কৃতি। সাহিত্য কথা এলা-নাচা আদি সৃষ্টি করিয়া মানসিক উৎকর্ষণর অভ্যাস বারো সাধনরে কৃষ্টি। সংসারেও সংস্কৃতি, কৃষ্টিও কাঠিক। অর্থাৎ সাহিত্য - কথা সঙ্গীত আদির আলোচনা তথা মানস অভ্যাস বা সাধনাই কৃষ্টি বারো আচরনীয় নিয়ম নীতিলো সমাজ সভ্যতার সংস্কার নিয়ন্ত্রণ করানিয়ে সংস্কৃতি। এসাদে সাহিত্যে বিভিন্ন ভাব-রস-তত্ত থানা থক। সাহিত্যে নবরস বারো উতার প্রকার ভেদ, বৈষ্ণবপদাবলী সাহিত্যে আছে চৌক।

সহিত্যরে হারপেইতে গেলেগো ইতিহাস হারপানি একান্ত অপরিহার্য। সাহিত্যর লগে ইতিহাসর অঙ্গঙ্গী সম্পর্ক। বক্রিমচন্দ্র বা রবীন্দ্রনাথ ঠাকুর বা শরৎচন্দ্র অকা, ইতিহাসবোধ থাইলেই তানোর সাহিত্যর সুবিচার বা পূর্ণ আশ্বাদ পানা সম্ভব। ইতিহাস অইলতায় অতীত জীবনে কৃত ভুল-ভ্রান্তি সংশোধন বা সংস্কার করিয়া বর্তমান জীবন ধারণ করানি যাতে ভবিষ্যত জীবন নিষ্ফলক অনা। বহুজনে এহান সম্পর্কে মাতেছি যে ঐতিহাসিকগো নাগোয়, সাহিত্যিকগোয় প্রকৃত ইতিহাস বেজা। যেগো যাম চিন্তা করে উগো দার্শনিক যেগো পর্যবেক্ষন করে উগো বৈজ্ঞানিক কিন্তু সাহিত্যিকরে Total Man বা সমাঙ্গক মানু বোলতারা। এ কারনে সাহিত্যিকগোয় আকবেদে ভাবানি, দেহানি (পর্যবেক্ষন) অর বারো ঐতিহাসিকগো অনা অর। ঐ কারনে প্রত্যেক দেশ তানোর নিজর নিজর সাহিত্যরে সমাদর রক্ষা করতারা।

শহীদ কুশল কোবর

সুনীল কুমার সিংহ

বিয়ান্নিশর গণবিপ্লবে আত্মাশ্রিত দেছিল দেশ সেবক উতার কথা মনে পড়লে পয়লাই কুশল কোবরর নাঙ হান আহের। বিয়ান্নিশর গণ অভ্যুত্থানে আসামর শহীদর সংখ্যা কম নাগয়, তানু অইলগাতায় যথাক্রমে বীরবালা, কনকলতা, মুকুন্দ কাকতি, মনবর নাথ, মডি কাছাড়ী, তিলেশ্বর কোঁচ, নুমলী নাথ, মঙ্গল কুর্মি, রতন কাছাড়ী, নুমিলী নাথ, দয়াল পানিকা, লেরেলা কাছাড়ী, সোমনাথ চুতীয়া, হেমো রাম পাতর, গণাভি বরদলৈ, কলাই কোঁচ, বৃকোদর গাঁও বুঢ়া, হেমরাম বরা, তিলক ডেকা, ভোগেশ্বরী ফুকননী, লক্ষ্মী হাজারিকা, ঠগীরাম সুত, বলো সুত, মদন বাউতা এতা হাবি মরনর লগে দুগ মরনর পার্থক্য আহান আছে। তানু অইলগাতায় কমলা মিরিবারো, কুশল কোবর। যোরহাট জেলে তানুর সহবন্দীগ অয়া আছিল প্রিয়নাথ বরুয়াই জেলে থাইতেই এ দ্বিগির মরন ল দুহান ডিগল কবিতা রচনা করেছিল। নিয়াম শারিরিক অসুস্থতা অনা সত্বেও গোপীনাথ বরদলৈ আদির অনুরোধ উপেক্ষা করিয়া জনজাতীয় ভলন্টিয়ার কমলাই জেলেত্ব মুক্তি পানা অস্বিকার করেছিল। ইংরাজ সরকারে পরিস্থিতিহান দেহিয়া বিনা সর্ভেভারে মুক্তির আদেশ দেছিল। ঘরে মানুষে যেবাকা তারে নেনারকা বুলিয়া আহেছিল। উবাকা জিঙতা মানুষতে নিয়া নুয়ারলাগা তা জিঙহান পুরা করিয়া জেলেত্ব মুক্তির আগেই পরধামে যাত্রা করেছিল। তার মতে পরাধীন দেশে জিঙতা অয়া থানাত্ব মরনিয়ৈ বালা। কমলা গিরকর চরিত্রে মনোবলর সুদৃঢ়তা পেয়ার। ‘সেতা উহান মরনেত্ত ডাঙর’ এ কথা এহান কমলা গিরকে মাতেছিল আরতা নিজর ক্ষেত্র প্রযোজ্য করিয়া দেখ্বাছিল।

কুশল কোবরর মরানি এহান অন্য শহীদেত্ত খানি আলাদা ধরণর আছিল। অন্য শহীদ মরেছিলতা পুলিশ বারো মিলেটারী গুলি খেয়া। গোয়ালপারার নিধানু রাজবংশীয়ে পাইকারী জরিমানা দেনা নুয়ারানির অপরাধে জন্তগর ডেকি নৃশংসভাবে গুলি করিয়া মারেছিল। অন্যগদে কুশল কোবরর বিচার অছিল, বিচার উহানাত ডাঙর ‘কিন্তু’ আহান থাইল। কোবরর বিচার ইংরাজ শাসন ব্যবস্থার Rule of Law র চক্রান্তময় আপপ্রয়োগ, রাজনৈতিক হত্যাকাণ্ড আহান।

সরু পথারর রেল দুর্ঘটনা উহান ভারতর গণ বিপ্লবর প্রকাশ আহান। উহানাত কারউ কোন দ্বিমত নেই। কিন্তু উ ঘটনা উহানর লগে কুশল কোবরর প্রত্যক্ষ বা পরোক্ষ কোন যোগাযোগ নেইছিল। উ মোকদ্দমা উহানর বিচারকগ শিবসাগর জেলার বড়সাহেব হামফ্রেই গিরকে কোনমতে আচুলিয়া পিছুলিয়া কোবরর বিরুদ্ধে ষড়যন্ত্র এহান হায়হান প্রমাণ করানির চেষ্টা করেছিল। সরুপাথরর রেল দুর্ঘটনা উহানর নায়কগ হিসাবে সরুপাথর মৌজার কংগ্রেস সম্পাদকগ কুশল কোবরর

লগে আরাকউ তিনগরে ফাঁসির অর্ডার দেছিল। তা আকখুরুমউ চিন্তা নাকরেছিল এসাদে নিরপরাধী নিরামিষ ভোজী গান্ধীবাদী মানু আগ ইংরাজর কপটতার বলি অইল। ১৯৪২ ইংরাজীর ৯ বারো ১০ অক্টোবর দিনে শিবসাগর জিলার টিটাবরর কাদাত কাছজান বারো সরুপাথরে সন্ত্রাসবাদীর কার্যকলাপে দুহান রেলদুর্ঘটনা অছিল। বে-সরকারী হিসাবে নিয়ামপারা ইংরেজ সৈন্য মরেছিল। যদিও সরকারী সূত্রমতে দুর্ঘটনাত বহুতগ বেসেপ অয়া জখম অইলেও কোনগ কিন্তু নামরেছিল। উহানাত কাছজানর দুর্ঘটনা উহানরে উপেক্ষা করিয়া সরুপাথরর ঘটনা এহানরে একমাত্র গুরুত্ব দেনার কথাহান অইলতায় সরুপাথর উহান আংশিক বাহিরা অঞ্চল (Partially excluded area) হান মতিয়া উ জাগা উহানাত অফিসারর বিচারহানেই চূড়ান্ত সিদ্ধান্তহান বিবেচিত অর। মৃত্যুদণ্ডরকা বুলিয়া উপেক্ষিত হইকোর্টর অনুমোদন না লাগের। ঘটনা উহানাত চল্লিশগ দোষীয়ে গ্রেপ্তার করেছিল। সাক্ষী হিসাবে অনুগত ভারতীয় অফিসার বারো অন্যান্য মানু পেইতে কোন অসুবিধা নেইছিল।

কেইসর তদন্ত হিসাবে পুলিশ অফিসার আগই সরুপাথর কংগ্রেসর অফিসগ তলাশী করতে পেপার কাটিং আহান পেয়া উহানল অত্র হিসাবে প্রয়োগ করলা, পত্রিকা উহানর হুঁ পিঠিত খালি জাগা আহানাত পণ্ডিতজী নাঙর মানু আগরে কুশল কোবর ডাহেছিল চিঠি আহান লগে অক্ষর পটেয়া শাবল, রেইঞ্জ, ছরি, লোবার রড ইত্যাদি যন্ত্র পাতির লিস্ট আহান পাছিল। পিছে হারপানি অইলযে পণ্ডিতজী উগ অইলতায় কোবরর ফাঁসির পিছে ধরা পড়িয়া একই অপরাধর বিচারে মুক্তি পাছে শ্রী বৈকুণ্ঠ সিংহ বুললা গিরক উগ। সরকারর পক্ষত্ব কুশল কোবরর আতর অক্ষর সিনাক্ত করানিরকা মৌজাদার আগও পেইলা, শহীদ কুশল কোবর দোষীগ হিসাবে যোরহাট জেলে থাইতে সহবন্দী সর্বশ্রী গোপীনাথ বরদলৈ, কৃষ্ণচন্দ্র দেব গোস্বামী, মহম্মদ তৈয়বুল্লা আদিয়ে যে চিঠির টোকা আদি ইকরেছিল। উতাত্ত কুশল কোবরর জীবনর বিষয়ে আমি খানি মানি আহান হারপেয়ার।

কোবর উপাধি লেখতার আহোম মানু এতা সময় আহানাত রাজার ঘররতা আছিল। তানুর বংশর গুড়ি বিহারলে তানুর পূর্বপুরুষ লাকুয়াত আছিল। আরতা সম্ভবতঃ মানর দিনে তানু লাকুয়াত উঠিয়া আহেছিল। কুশলর বাপক সোণারাম কোবরে সরুপাথর অঞ্চলে রুকর ব্যবসা করানিত যত্ন নেইছিলগ। লগে দোকান আগউ দেছিল। জাগা পটা পটা খেতি বাড়ি করেছিল। পিছে লৈমইতেগা গন্ধকটৈ বুলতার গাঙ উহানাত গিয়া আছিলগ। গাভুরাপোয়াগ আছিল কুশলে উবাকা রেংনাই বুলতার জাগা উহানাত স্থল আগ খুলিয়া মাস্টারী করেছিল।

পিছে কতদিন আহান বাগানেউ চাকুরী করেছিল। তার স্কুল জীবনহান গোলাঘাট টাউনে কাটাছিল। তানুর ঘরর লগে সমান মর্যাদা আছিল নিঙল আগরে লহঙ করিয়া ঘর-সংসারউ করেছিল। আরতা উতা নিয়াম মিতব্যয়ীং আছিল। তার মুঙে অন্য কোনগই বে-হিসাব অয়া কাম করলে তা নিয়াম খারাপ পাছিল। দশগর বা সংগঠনর রূপা পইসাতে গজেও নির্দেশ পেইলেহে খরচ করেছিল বারো বছরেক্রে সততার পরিচয় দেছিল। অন্যগদে সংগঠনর কাম করানিরকা নিজর যৎসামান্য আয়রকা বুলিয়া ব্যবহার করেছিল সিলাই মেশিন উহানউ বেচেছিল।

জাতির জনক মহাত্মাগান্ধীরে দরশন করানির পিছে তা খাদি ফুতির প্রতি অনুরক্ত অছিল। ১৯৩০ সনে মহাত্মা গান্ধীয়ে লবন আইন অমান্য করানিরকা বিখ্যাত দাণ্ডীযাত্রা করলে কোর্টরেউ নুন ব্যবহার নাকরেছিল। প্রতিজ্ঞা এতা হাবি পালন করেছিল উহানে তার মনর দৃঢ়তার পরিচয় পেয়ার। মাদক দ্রব্যর প্রতি তা নিয়াম বিরোধ করেছিল গিরকর মইলক প্রভাবতীয়ে গান্ধী দর্শনর হারৌ দিনর কথা, চরকাত সুতা কাটানির কথা আদি কোর্টরর প্রথম জীবনীকার শ্রী ললিত বরারান্ড হাবি হবা করে ব্যক্ত করেছি। যেহান আমি পিছে তার জীবনীত পেয়ার।

কোর্টরর জেল জীবনরে আমি দুহান ভাগে ভাগ করানি পারিয়ার। আহান অইলতায় ফাঁসীর হুকুম পানার পিছে নির্জ্ঞান বন্দী জীবন উহান। জেলর ভিতরেউ তা কনিষ্ঠ সমাজ কর্মীগ নিজে মাছ মাংস নাহেইলেউ তা কিন্তু অন্য বন্দীরকা বুলিয়া উতা রাখে দেছিল। নিয়মিত প্রার্থনা আদিতউ তা সবসময় আগ ভাগ নেছিলগা।

ফাঁসির হুকুমহান পানির পিছে কিন্তু তার মনহানাত আত্মীক নিঃসঙ্গতা আহান নামিয়া আহের। তার সহবন্দী আগর মতে পয়লা পয়লা তা নারগ নিকালেয়া দৌঅর নাঙ গাছিল। পিছে সেলগ রাহেকুরা উতার লগে ধর্মর কথা টটরাছিল। কিন্তু কোনদিন পাখরিয়াউ জেলর কথা বারো এ দুর্ভাগীয়া জনম এহানর কথা না টটরাছিল। কিন্তু মরনর পিছেকার অনন্ত জীবনর কথা হাদি হাদিত মাতেছিল। তারে দিনে খানারতা দেনার সময় জেলগর বারান্দাহান পাহিয়া পলিয়ে বুজেছিল।

ধর্মীয় নামঘোষা কীর্তন ঘোষা আদি মনেস্ত গাছিল। আরতা আতহানাত সব সময় গীতা আহান ধরিয়া থছিল। গান্ধীবাদী কংগ্রেস কর্মীগ হিসাবে তা জেলে যানার আগেতউ গীতাহান নিয়মিত পাঠ করেছিল। এমনকি সভা সম্মিতিত যিতেগাউ গীতাহান লগে থছিল। আমি দেহিয়ার যে, ভারতর বিপ্লবী চিন্তাত কার্লমাক্সর চিন্তাধারা হমানির আগে গীতাহানেই আছিল হাবিবর আশ্রয়র কেন্দ্রস্থলগ। লোকমান্য তিলক, মহাত্মাগান্ধী আদিরতা নিজস্ব নিজস্ব গীতা ভাষা আছিল, আসামর জনপ্রিয় নেতা লোকপ্রিয় গোপীনাথ বরদলৈয়েউ গীতা চর্চা করেছিল।

কিন্তু দুঃখর কথাহান কুশল কোর্টর জেলে যিতেগা তার গীতা উহান পুলিশে বাজেয়াপ্ত করেছিল। পিছে জেলে থাইতে গোপীনাথ বরদলৈয়ে তারে গীতা আহান আনিয়া উপহার দেছিল। কোর্টরে গাঙে থাইতে নাম প্রসঙ্গ আদিত যোগদান করেছিল আরতা সাংঘিক জীবন যাপন করেছিল, কর্মজীবনে দেশ সেবা এহানেই তার আদর্শহান আছিল।

ফাঁসীর আগেকার দিন মানে ১৯৪৩ সনর ১৪ই জুন তারিখে তারে সাঙ্ঘনা দেনারকা, বুজানিরকা বারো লমৈলগা দেখা করানিরকা বুলিয়া গড়মুড়র ডেকা অধিকার কৃষ্ণকান্ত দেব গোস্বামী আর আর লগরতাল জেল অধিকারীর অনুমতি লয়া আহেছিল। আয়া তানু সাঙ্ঘনা দেনিতে দুইইর কথা তা উল্ট হাবিরে জ্ঞানপূর্ণ উপদেশগ মাছি দেছিল। কৃষ্ণকান্ত দেব গোস্বামীয়ে পিছে মাতেছিল – কোর্টরে হাবিরে দেহানির পিছে নমস্কার জানেয়া মাতেছিল, আজি মোর সৌভাগ্যহান তোমার হাবিরে লগে পেইলু, দেখলু, দেশরকা বুলিয়া স্বজাতিরকা বুলিয়া মোরে প্রাণদণ্ডর আদেশ দিলা। এসাদে সৌভাগ্য কয়গরতা অরতা। আমার দেশহান স্বাধীন অক্ এহানেই ভগবানরাঙ মোর একান্ত প্রার্থনাহান।

কোর্টরর অন্তরস্পর্শী কথা উতা হুনিয়া হাবিরে বাহিরেদে হারৌ দেহেয়লউ ভিতরেদে কিন্তু মন মরা অয়া বিদায় নেছিলগা।

পিছে গোপীনাথ বরদলৈর থতাত হারপানি অছিল যে, কোর্টরে মাতেছিলতা জরম অইলে আকদিন কিন্তু মরানি লাগতে আরতা মি হুনেছু এসাদে মরলে নাকি পুনঃ জরম অয়ার উনি। জরম অইতে মি ইমার কোকগত দেউঘন্টার ডেকি ভুগেছিলু উনি, কিন্তু মরতে মাত্র পনর মিনিটর চুবা হে ভুগতউ হুদা দেহগত হে খানি যাতনা পেইতউতা। কিন্তু আত্মাগরে কোঙগই অউ মারে নুয়ারতাই। আত্মা এগ স্বাধীনগ বারো কোঙগই অউ এগরে ছক নুয়ারতারাগ আত্মা যেগই দেছিল উগই হে ফিরেয়া নিতইগাত। কথা এতা মতিয়া তা পুলছিল। প্রায় দ্বি-হৌর চুবা কংগ্রেস কর্মীর মুঙে মুরগ নঙেয়া হমা জানাছিল। নিভীক আত্মা উগর মুঙে আমিউ হাবি মুর নঙেয়া উবা অছিল। আমি দেখলাঙ মরন এহানরে তা স্বাভাবিক ভাবে নেছিলগা, ফাঁসির আগেকার রাতি উহান তা কালি কিহান অইতয় উহান সুপউ চিন্তা নাকরিয়া কিঙাউ নাহেগর ডেকি নিশ্চিত অয়া ঘুমজাছিল। জেলর কর্মচারীয়ে তারে বিয়ানে উঠেইতে তা আঙ করেছিল “মোরতা সময়হান অইলখাঙ”। যেন সাধারণ যাত্রা আহানাত তা যানারকা বুলিয়া প্রস্তুত অছিল।

এসাদে নিভীক শহীদ আগ আছিল কুশল কোর্টর। তার উসাদে আত্মজীবনী কোমপেইতউ স্বয়ং সম্পূর্ণ অয়া নেয়। তার কীর্তি যশ আসামবাসীর থতায় থতায় বিদ্যমান। তা কিন্তু মরিয়াউ মরে নুয়ারের। তা সবসময় আসাম বাসীরাঙ চির নমস্য থাইতে উহান শ্বেনেয়।

অমৃত চয়ন

ব্রজগোপাল সিংহ

অবসর সময় আহানাত শ্রীকৃষ্ণ বারো পার্থ দ্বিগুণ সখায় পদচারণা করতারা। পার্থর মনে অহংকার - তা প্রভুর হাবিস্ত প্রিয় পাত্রগো; তার ডেকে প্রভুরে নিংকরেকুরা বিশ্বচরাচরে নেই। এ ভাব এহানর পরিপুষ্টিরকা তা কথাহান তুললো -

অর্জুন : ইতাও! তোর হাবিস্ত প্রিয় সখা এ বিশ্ব এহানাত মি ছাড়া কোংগ আছি? তোরে মি যতহান ভক্তি করৌরি ঔসাদে করেকুরা কোনগউ নেই। কিন্তু মি লক্ষ্য করৌরি তি হাদি হাদিত অন্যমনস্ক অয়া কিতা আহান খালকরর। কোন আগরকা হাদি হাদিত বিচলিত অর পারা।

কৃষ্ণ : হায় সখা কথাহান চুম। তোর সাদানে মোরতা আর কোংগো তে আছি। তবে কোংগই কিসাদে মোরে নিংকরতারা এহান বিশদ ভাবে মাতানি চিল।

অর্জুন : সখা। মোর মনে সন্দেহ আহান জাগাদিলে। কথাআহান হারপানির ইচ্ছা আহান মোর মনে জাগের। মোর সাদানে তোর নিংকরেকুরা আগ দুগোর নাং সখায় মোরে মাত।

কৃষ্ণ : (চিন্তাকরিল ভাব করিয়া) সখা। কইতে ঔসাদে কোনগর নাঙ মনে করে নুবরৌরি। তবে আয় আরাক খানি আণ্ডয়েইক য়ারি দিয়া দিয়া।

খানি আণ্ডয়েইতে দেখতারা মধ্যবয়সর মানু আগো মাটির হাদিত বয়া পুরানা কেলেছে ঘাস বাছে বাছে খার। কৃষ্ণরে প্রশ্ন করলে “তি নিজে গিয়া কিতা করেরতা আংকরগা। মি এপেইত আছু” বুলিয়া মাতল।

অর্জুন : গিরক। মি কথা আকচুটি হারপানিরকা আইলুতা। গিরকে দেহউরিতা ঘাসর হাদিত পুরানা মরেছে ঘাস ঔতা বাছে বাছে খা য়ারগা এহান কি কারনে।

মানুগো : চা পৃথিবীর ঘাস শস্য হাবিতার প্রাণ আছে। মি এরে মরা ঘাস এতা খেয়া প্রাণ ধারন করৌরি জীবহত্যা করানির অপাৰাধ নাক বুলিয়া।

অর্জুন : গিরক! ঔহানতে হারপেইলু, কিন্তু গিরকর কাকালিত খুলাসত অসি (তরোয়াল) এহানর মর্মহান তে কিহান। এবেদে জীবহত্যা না করানির পণ কিন্তু কাকালিত অসি ?

মানুগো : ও এহানতে তিনগো মানুরে মারানিরকা থছুহান। ঔতারে পেইলে মি কদাপি না এরেদিতো।

অর্জুন : কোংগো কোংগো ?

মানুগো : পয়লা নম্বর অইলতা নারদ। পাষণ্ডগো। চব্বিশ ঘণ্টা “নারায়ন নারায়ন” বুলিয়া প্রভুরে তিল আহান বিশ্রামর সুযোগ আহান নাদের। তারে পেইঙ করে বাছ।

অর্জুন : আরতাতে কোংগো?

মানুগো : দুই নম্বর অইলতাই প্রহ্লাদ। চা মোর প্রভুরে আন্তির জাঙর তলে সমুদ্রর তলে, কত বিপদসকুল জাগাত নিজে জিৎতা অনারকা বুলিয়া আছুলিয়া নেছেগা। স্বার্থপর। তারে পেইলেউ না এরাদিতো।

অর্জুন : তৃতীয়গোতে কোংগো ?

মানুগো : তিন নম্বরগো অইলতাই অর্জুন। আগর দ্বিগিরে এরা দিলেও এগোরেতে সুপ্পৌ না এরাদিতো। বরবাগরর ডাঙর যুদ্ধাগো অছেতা। মোর প্রভুরে সারথি করানির শাস্তি তারতা পানা লাগতে।

অর্জুনর অহংকার চূর্ণ অইল। মুরগো কিংকো নঙেয়া কৃষ্ণরাং গিয়া মাতেরগা -

“সখা মোর হাবিস্ত প্রিয় বা শ্রেষ্ঠ ভক্তগো অনার অহংকার হান গেলগা। তোরে কোংগই কিসাদে নিংকরতারা তার মেয়েক আগ হারপানিয়উ চিল প্রভু।”

মাতৃ সুরক্ষা

ডঃ সুকুমার সিংহ

নারী প্রকৃতির দান। নারী মনুষ্য সমাজে অমূল্য ভূমিকা পালন করানিরকা সৃষ্টিকর্তার সৃষ্টহানাৎ জরম অছিता। পুরুষ ও নারী মনুষ্য সমাজ এহানাৎ উল্লেখনীয় অংশ নিতারাগাতা, আগ বাদদিয়া অন্যগয় মানবধারা চলানি নুয়ারতারা ফলে দ্বিজাতির বর্তমান থানা অতীব জরুরী। তেব নারীপতির প্রয়োজন সর্বাগ্রে বুলিয়া নিঙকরানি থকছে। নারী মনুষ্যসত্তান গর্ভে ধারন করিরি, জরমদিরি লালন পালন করিরি, ডাঙর করিরি, মাতহান ফুটাদিরি, আটানি চলানি হিকাদিরি, সভাসমাজে

লেখাপড়া জরুরি বুলিয়া নিজর সন্তানগবে লেখাপড়া বিদ্যা তালকরানিৎ উল্লেখযোগ্য ভূমিকা নিরিগা। সংসারে ঘর আগো ধরানি বুন্ধে নারী ছাড়া গতিহান নেই। নারী জাতীয়ে মাতৃ জাতির ভূমিকা নিয়াম করে পালন করতারা বুলিয়া পৃথিবী এহানাৎ নারী এগরে মাতাগো বুলিয়া হাবিস্তে পরিচিতি দেছিता। ফলে নারীজাতি এতারে মাতৃজাতি বুলিয়া সমাজে উচ্চস্থানে বহানি থকরহান। এহানলো আমি নারীজাতির সুরক্ষা করানিৎ তৎপর অইয়া মাতৃজাতির সুরক্ষা অটুট

করানি থকছে।

আমি হাবিয়ে আহান নিঙকরিয়া থাইয়ার যে পুরুষজাতি এহান শক্তিমান, বলবান তানু যে কামহান করতারা নারীজাতিয়ে ঔতা নুয়ারতারা বুলিয়া নিঙকরিয়া নারীজাতি দুর্বল জাতি বুলিয়া অবহেলা করিয়ার। এছাদে নিঙকরানি না থকহান। প্রকৃতিয়ে তানুরে যে শক্তি দেছে মুনি মানুগোরাঙ ঔহানি নেয়ছে। সন্তান জরম দেনা, লালন পালন করানি সেবা শুশ্রূষা করানির ধৈর্য্য নিজে নাহেইয়া নাপিয়া নিজর ছৌগরে খৌয়ানি পিয়ানি বিপদে আপদে নিজর ছৌগরে রক্ষা করানির শক্তি এতাহাবি মুনিমানুগোরাঙ নেয়ছে।

জীবনীশক্তি বা নিয়ামদিন জিংতা অইয়া থানার শক্তি এহানো নারীজাতিরাঙ নিয়াম অর্থাৎ মুনিমানুগোরাঙত জেলেই মানুয়ে নিয়ামদিন জিংতা অইয়া থাইতারা নুয়ারা পানি ও জেলামানুৱাঙ বহুৎ কম। জরমর দিনেত্ব পাঁচবছর পেইয়া মুনিছৌ এতা নিয়াম পারা নুয়ারাত ভুগতারা বার মরতারা এহান পরিসংখ্যানে মাতেরহান। বারো ৬০ বৎসরর গজে বুড়াবুড়ীর সংখ্যা লইলে বুড়ীর সংখ্যা নিয়াম বুলিয়া পরিসংখ্যানে মাতের।

নারী জাতির সুরক্ষা দেনার ব্যাপারে নানানদিক দিয়া চিন্তাভাবনা করার পথ মাহেই আছে। আমি চিকিৎসক হিসাবে আমার করনীয় পথগো অইলতায় নুয়ারা পানি নাইয়া সুস্থাস্থ্যে অধিকারী করিয়া জনমহান পালন করানির দিশাহানি বাগাদেনা।

নারীজাতি ঘর গৃহস্তির কামে নিয়াম সময় কাটেইতারা। শারীরিক মানসিক পরিশ্রম মুনি মানুর সমান করতারা, কিন্তুমান আপদ

বিপদ নানান নুয়ারা এতাৎ কমপারা ভুগতারা। ইমা ইন্দল তানুরতা নুয়ারাপানি অনার সময়হান অইলতায় মনুষ্যসন্তান গর্ভে ধারণ করানির সময় জরমদেনার সময় বার দুধপান করানির সময় এহানিৎ তানু নিয়ামপারা ভোগতারা। পুষ্টিহীনতা রক্তাক্ততা এতাৎ ভুগিয়া শারীরিক শক্তিহীন, দুর্বল অইয়া নিজর গারীগর রোগ প্রতিরোধ ক্ষমতা হারেইয়া নানান সংক্রামক নুয়ারাৎ পড়িয়া মরন ফাঙইতারা।

মাতৃমঙ্গল প্রকল্প বুলিয়া স্বাস্থ্য পরিসেবা আহান সরকারীস্তরে চালু বহুদিনেত্ব আছেতা। গর্ভে সন্তান আহানির সময় ও জরমদেনার সময় পেইয়া মাসে মাসে সপ্তাহে সপ্তাহে চেকআপ করানি, মূত্র পরীক্ষা ব্লাডপ্রেসার পরীক্ষা করানি রক্তাক্ততা নিবারন করানিরকা আয়বন ফলিক এসিড পিল খানারকা দিতারা, ধনুস্তংকার নুয়ারা নানারকা টিটেনাস টক্সয়েড ইংজেকশন দিতারা। ডেলিভারি ঘরে না করিয়া হাসপাতালে করানির পরামর্শ দিতারা - এবাকা এহান বাধ্যতা মূলক করলা। গর্ভধারণ করানির সময় ও সন্তান যতদিন দুধপান করতায় সময় এহানিৎ পুষ্টিকর খাদ্য খানার পরামর্শ দিতারা। সন্তানরে নিজর দুধপান করানির পরামর্শ বার নানান নুয়ারাপানি নানারকা পুষ্টিকর খাদ্য ও ইমুনাইজেশন ব্যবস্থা লনার পরামর্শ দিতারা।

ইমা ইন্দল তানু যদি ছৌ গারীগত অনার সময় হানাৎ ছৌ জরমদেনার সময় ছৌগরে সেকম পিয়ানির সময় বার ছৌগর ছয়মা বয়স অনা পেইয়া যে নিয়মনীতি পালন করানির পরামর্শ দিতারা এতা যদি নিষ্ঠাল পালন করলে মাতৃসুরক্ষা বিধিৎ নিয়ামপারা আগবাঢ়ানি যাকরের।

চিঠিপত্রে মতামত

(চিঠিপত্রে মতামতরকা সম্পাদক সংকলক প্রকাশক দায়ী নাইগে)

সম্পাদক ডাঙরীয়া।

অপরূপা মাসিক সাহিত্য সংকলন আহান আমার বিষ্ণুপ্রিয়া মণিপুরী ঠারে মাঘত নিকুলতৈ হনিয়া জবর হারৌ ঐলু। আমার সাহিত্য প্রেমীরতা সাহিত্য চর্চার ফায় আহান পেইতাঙাই। ‘অপরূপা’র দীর্ঘায়ু কামনা কররী। ইতি

শ্রীমতি মানসী
অশেষ ধন্যবাদ
সম্পাদক
২৬/০১/২০০৫ইং

মানসী, গৌহাটী

সম্পাদক গিরক !

গৌহাটীত ছনিয়া আইলু 'অপৰূপা' নাংৰ মাসিক সাহিত্য সংকলন আহান মাঘে শতৈতৈ। মি উহানৰ গ্ৰাহক অনা মনাউৰী। আপনাৰ পৰিচালনায় গোপেন্দ্ৰ সিংহৰ সম্পাদনায় বিষ্ণুপ্ৰিয়া মণিপুৰী সাহিত্য সভা পত্ৰিকাহান পাকড়িয়া নুঙেই পাছিল। এ 'অপৰূপা' উ নাংহানৰ সাদানে অপৰূপ ঐতে আশা ধৌৰী। ইতি

শ্ৰীযুক্ত কুসুম সিংহ
আপনাৰে ধন্যবাদ
সম্পাদক
২৬/০১/২০০৫ ইং

কুসুম সিংহ
কৈলাশহৰ

সম্পাদক সমীপেষু !

মাসিক সাহিত্য সংকলন 'অপৰূপা'ৰ কা বুলিয়া মোৰ বন্ধু বিভূতি সিংহয় য়াৰী আহান ইকরতে দেহেছিল। তার কথাত হারপেইলু 'অপৰূপা' মাঘ মাহান্ত মাহে মাহে প্রকাশ পেইতে। মি উহানৰ নিয়মিত পাঠক অনা মনাউৰী। উহানৰকা মি রূপা আহৌ আহান দিয়া পেঠেইলু। মোরে লেখিকহান নিয়মিত দিয়া পেঠেইবাং। ইতি

শ্ৰীমতি ফুল কুমারী সিংহ
অপৰূপা পেইলে কি না পেইলে জানেইছ।
সম্পাদক।
২৬/০১/২০০৫ ইং

শ্ৰীমতি ফুলকুমারী
পাথারকান্দি
১২/০১/২০০৫ ইং

মাননীয় সম্পাদক !

'অপৰূপা' মাসিক সাহিত্য সংকলন আপনাৰ সম্পাদনাত মাহে মাহে নিকুলতৈ ছনিয়া হারৌ ঐলু। সমাজৰ তাবৎ সাহিত্যিকৰ রচনাবলী এহানাং প্রকাশ পেইলে অতি হারৌ ঐতৌ। হংনা ধৈবাং। ইতি ১৩/০১/২০০৫ ইং

শ্ৰীযুক্ত মনিহার সিংহ
চেষ্ঠা থৈতৌ
সম্পাদক
২৬/০১/২০০৫ ইং

আপনাৰ বিশ্বস্ত
মনিহার সিংহ
নরসিংহপুৰ

মাননীয় সম্পাদক মহাশয় !

তিন মাহিয়া পত্ৰিকা বিষ্ণুপ্ৰিয়া মণিপুৰী সাহিত্য সভা, আসাম, কাৰ্ত্তিক মাঘ সংখ্যাহানি না পেইলু। পত্ৰিকাহান পাক্ৰিয়া নুঙেই পাছিল। পত্ৰিকাহান গড়নে গঠনে কাগজে ছাপায় ষ্টাৰ্গাৰ্ড ঐয়া অতি হোভা অছিল। উতার গজে কবিতা, গল্প, প্রবন্ধ উতা হোভা অছিল। বিশেষ করে জ্যোতিষ বারো চিকিৎসা বিদ্যা জবৰ প্রয়োজনীয় আছিল। এসাদে পত্ৰিকা আমাৰ বিষ্ণুপ্ৰিয়া মণিপুৰী সাহিত্য জগতে আজি পেয়া না নিকুলেছে। সংখ্যাহানি না পেয়া মনে হিন পকছে। শতৈলে দিয়া পেঠা দিবাং। ইতি

মালিনী দেবী
কৈলাশহৰ
১০/০১/২০০৫ ইং

সহদয় পাঠিকা মালিনী!

পত্ৰিকাহানে তোরে নুঙেই করেছে ছনিয়া হারৌ ঐলু। শ্ৰীযুক্ত নরেন্দ্ৰ কুমার সিংহ গিরকে আমাৰ সাহিত্য সভাহান ঠকা মিছা বুলিয়া মামলা আহান করেছে হান্তে আপাততঃ প্রকাশনা স্থগিত থৈলাং।

এবাকা 'অপৰূপা' বুলিয়া সাহিত্য সংকলন আহান নিকুলতৈ, পাকড়বাং। আশা ধৌৰী নিরাশ নাইতাঙাই, সাহিত্য সভা পত্ৰিকাৰ ডেকি হারৌ ঐতাঙাই।

সম্পাদক
২৬/০১/২০০৫ ইং

অপরূপার নিয়মাবলী

- ১। “অপরূপা” সাহিত্য সংকলনহানর দাম প্রতি সংখ্যা রূপা ২০ হান।
- ২। সংকলনহান ডাকযোগে দিয়া পেঠানি ঐতে।
- ৩। সংকলনহানর দাম (তিন মাহা / ছয় মাহা / বছর আহান) অগ্রিম দেনা লাগতৈ।
- ৪। সংকলনহানর দাম Cheque/Draft/M.O./ Cash দেনা পারতাঙাই।
- ৫। গ্রাহকর নাঙ, ঠিকানা গাঙর নাং / শহরর নাং / পথর নাং / ঘরর নম্বর / পোষ্ট অফিস / পিন নম্বর, টেলিফোন থাইলে টেলিফোন নম্বর দিলে সংকলহান দিয়া পেঠানিত সুবিধা ঐতে।

১। বিজ্ঞাপনর বিষয়বস্তু / Logo/Design/Literature পরিষ্কার করে ইকরিয়া বা ছাপেইয়া দিলে হবা।

২। বিজ্ঞাপনর মাণ্ডল অগ্রিম দেনা লাগতৈ।


৩। বিজ্ঞাপনর মাণ্ডল	ভাগ	রূপা
২নং	Cover Page	৮০০ হান
৩নং	..	৮০০ হান
৪নং	..	৬০০ হান
	চারভাগের তিন ভাগ	৬০০ হান
হাদির যে কোন পৃষ্ঠা আহান		৫০০ হান
হাদির যে কোন পৃষ্ঠা আহান	পৃষ্ঠার দুই ভাগের এক ভাগ	২৫০ হান
হাদির যে কোন পৃষ্ঠা আহান	পৃষ্ঠার চার ভাগের এক ভাগ	১০০ হান

‘অপরূপা’ত লেখা দিয়া পেঠানির নিয়মাবলী

- ১। লিখা পরিষ্কার ডাঙর আখরে, আক পৃষ্ঠাত ইকরানি লাগতৈ।
- ২। অমনোনীত লেখা ফিরং পানারকা উপযুক্ত ডাক মাণ্ডল দিয়া নাং ঠিকানা ইকরা খাম আগ দেনা লাগতৈ।
- ৩। মনোনীত লেখা সংকলনহানাত ছাপলে ও লিখা ফিরং দেনা নাইতৈ।
- ৪। প্রতি মনোনীত লেখারকা রূপা ১০০ হান দেনা ঐতে।
- ৫। লেখা সংকলনে ছাপলে ও সংকলনর সংখ্যার লেরিক আহান লেখকরে লেখা স্বীকৃতি স্বরূপ বিনামূল্যে দেনা ঐতে।
- ৬। পূর্ব প্রকাশিত লেখা সংকলনে না ছাপতৈ।

মণীন্দ্র কুমার সিংহ
পরিচালক

সর্বপ্রকার সম্পর্করকা
M.K.Sinha, IFS (Retd)
Rajgarh Rd, West bye lane - 12
Kundil Nagar, House No - 47
Guwahati - 781007
Tel - 2514041



অপৰূপাৰ নিয়মাবলী

- ১। “অপৰূপা” সাহিত্য সংকলনহানৰ দাম প্রতি সংখ্যা রূপা ২৫ হান।
- ২। সংকলনহান ডাকযোগে দিয়া পেঠানি ঐতে।
- ৩। সংকলনহানৰ দাম (তিন মাহা / ছয় মাহা / বছৰ আহান) অগ্রীম দেনা লাগতে।
- ৪। সংকলনহানৰ দাম Cheque / Draft/ M.O./ Cash দেনা পারতাঙাই।
- ৫। গ্রাহকৰ নাঙ, ঠিকানা গাঙৰ নাং / শহরৰ নাং / পথৰ নাং / ঘরৰ নম্বর / পোষ্ট অফিস / পিন নম্বর / টেলিফোন থাইলে টেলিফোন নম্বর দিলে সংকলনহান দিয়া পেঠানিত সুবিধা ঐতে।

- ১। বিজ্ঞাপনৰ বিষয়বস্তু Logo / Design / Literature পরিষ্কার করে ইকরিয়া বা ছাপেইয়া দিলে হবা।
- ২। বিজ্ঞাপনৰ মাণ্ডল অগ্রিম দেনা লাগতে।
- ৩। বিজ্ঞাপনৰ মাণ্ডল


	ভাগ	রূপা
২নং	Cover Page	৮০০ হান
৩নং	"	৮০০ হান
৪নং	"	৬০০ হান
হাদির যে কোন পৃষ্ঠা আহান		৫০০ হান
হাদির যে কোন পৃষ্ঠা আহান	পৃষ্ঠার দুই ভাগের এক ভাগ	২৫০ হান
হাদির যে কোন পৃষ্ঠা আহান	পৃষ্ঠার চার ভাগের এক ভাগ	১০০ হান

অপৰূপাত লেখা দিয়া পেঠানিৰ নিয়মাবলী

- ১। লিখা পরিষ্কার ডাঙৰ আখৰে, আক পৃষ্ঠাত ইকরানি লাগতে।
- ২। অমনোনীত লেখা ফিরং পানারকা উপযুক্ত ডাক মাণ্ডল দিয়া নাং ঠিকানা ইকরা খাম আগ দেনা লাগতে।
- ৩। মনোনীত লেখা সংকলনহানাত ছাপলে ও লিখা ফিরং দেনা নাইতে।


পরিচালক

সর্বপ্রকার সম্পর্করকা
M.K. Sinna, IFS (Retd.)
Rajgarh Road, West bye lane - 12
Kundil Nagar, House No. - 47
Guwahati - 781 007
Tel - 2514041



PHALEI



Orion Tower, G.S. Road, Christian Basti, Guwahati - 781 005
 Shop No. 19, Mezzanine Floor
 Telephone : 2340204

Centre of Handloom, Handicraft & Garments
 Outlet of North-East Women's Welfare Society - Assam
 &

The only Library of the Bishnupriya Manipuri Language Books, Periodicals, Journals,
 Magazine and News Papers.

ফলেই

শাখা দোকান

রাজগড় রোড, ওবেষ্ট বাইলেন - ১২, (কুণ্ডিল নগর পথ) ঘর নং - ৪৭,
 গুৱাহাটী - ৭, ফোন - ২৫১৪০৪১

উত্তর-পূব ভাৰতে বিষ্ণুপ্ৰিয়া মণিপুৰী হস্ততাত-বস্ত্ৰশিল্পৰ একমাত্ৰ দোকান
 আসাম, বাংলা, মণিপুৰ, নাগালেণ্ড, মিজোৰাম, অৰুণাচল, উড়িষ্যা, উত্তৰ প্ৰদেশ, হৰিয়ানা, কাশ্মীৰ, হেণ্ডলুম বাৰো
 হেণ্ডিক্ৰেফ্টৰ নিৰ্ভৰযোগ্য দোকান।

১৯৯৬ইংৰাজীত জাতীয় সেৱাত ব্ৰতী আছে।

North-East Women's Welfare Society - Assam

বাৰো

বিষ্ণুপ্ৰিয়া মণিপুৰী ঠাৱৰ লেৱিক-লেইছৌ, পত্ৰ-পত্ৰিকাৰ একমাত্ৰ গ্ৰন্থাগাৰ।

বিষ্ণুপ্ৰিয়া মণিপুৰী সাহিত্য সভা পত্ৰিকা ফলেইত পেইতাঙাই।

সম্ভাষা - প্ৰকাশক - বেছেকুৱা - সেৱাৰী।

পৰিচালক
 ফলেই

Culture Handloom, Habit Handloom
 Support poor women weavers of the North-East
 &

Culture Writings, Habit Reading
 Support Mother Tanguie, Serve the people

Management
 Phalei